

ÈKÈLEEZÌYÀ NEÀYE KUMPÀLÀ KWÀ DIKÈNGA DINÈNE ANYÌ?



Twinyikàayi mitù yètù bwà katancì kakesè cyanààna mpindyewu bwà mwàkù wà disambila.

² Nzambi Mutàmbe Cijila nè Mwakàne, tudi baswè kuKusàkidila bwà bwimpè Bwèbè, bwalu mbwimpè kutàmbe nè mwoyi kutùdi. Nènku tudi tulòmbe bwà Wèwè kutwilanganakù neetù dilòlò edi mu mùshindù wà pabwàwù menemene, nè kutupèesha mabènesha Èbè. Tùmonàkù cyanza cinène cyolola cyà Musungidi wetù wa dinanga, bwà kukwàcila babèedi nè beena ntàtu mudimu. Nè bwà kwakidilakù aba bàdi bazengèle mu njila wa mpèkaatù, dilòlò edi abu. Bwà kubàbiikila ku nzùbu wa Taatù kùdìbo nè cyà kwikalakù aku.

³ Tudi baswè kuKulòmbe bwà kuvùlukakù aba bàdi bapàmbùke mu njila mubùmbàkàne nè mubùlakàne, bwà bààmòna pààbò mwà kwalukila kàbidi ku bwobùmwe bwà Taatù.

⁴ Nènku tudi tulòmbe, dilòlò edi, Mukalenge, bwà Wèwè kukàngulakù macì à bantu, bwà kutèeleja Èvànjeeliyò, nè bwà Wèwè kutengula mishikù yà mwakudi. Nènku twàngaciibweku ànu ku mudimu bwà butùmbi Bwèbè. Nènku ku ndekeelu kwà disangisha edi, patwàyà ku mbanzà yètù mishiiilèshiiilàngàne, swàkù bwà twàmbè mùvwà bàvwà bàfùminà ku Èmawùsè abu nè: “Myoyi yètù kayivwa yilàkuka kapyà munda mwètù, pàvwàYe wàkula neetù mu njila apu anyi?” Bwalu tudi tulòmbe nùnkù mu Dìna dyà Mwan’Èbè, Mukalenge Yesù. Amen.

⁵ Ndi njinga kubalakù ndambù mu Mifùndu dilòlò edi, nshapità wa 17 wa Luukà Munsantu, nè kubangila ku mvensà wa—wa 26.

Nènku ànu muàkadibi mu matùkù à Noà amu, ke muwikalàbi kàbidi mu matùkù à Mwànà wa muntu.

Bàvwa bàdya, bàvwa bànwà, bàvwa bàsèla bakàji, bàvwa bàsèleshiiibwa, too nè mu ditùkù dyàkabwelà Noà mu bwàtù, nè mvùlà yà cipùpu kulwayi, nè kubàbutulayi bònsò.

Byà mwomùmwe kàbidi ànu nè mùvwàbi mu matùkù à Lotà; bàvwa bàdya, bànwà, bàsùmba, bàsùmbisha, bàkùna, bàvwa biibaka;

Kàdi ditùkù dimwèdimwè dyàkapàtukà Lotà mu Sodomà... kapyà nè soufre kulòkabì mu dyulu, nè kubàbutula bònsò.

*Ke mwènzekàbí mene mu ditùkù dyàbuuludiibwà
Mwánà wa muntu.*

⁶ Nènku bwà cyena-bwalu, ndi njinga kwangacila mu Genèsè, nshapità wa 19 ku—ku mvensà wa 22.

Lwìjàkàjà wèwè, nè lwàkù apa; *bwalu ncyèna mwà
kwenza bwalu nànsha bùmwè to too nè pawàlwà aku.*

⁷ Mu dindà emu, mvwa ngààkula bwà manyooka àcilwalwà, nè dilòlò edì ndi muswè kutùngunuka. Tudi mwà kuumvwa mpeepèlè yà luuyà lukolè yà cilumbulwidi cidi cyènda ciseemena cyà Nzambì wa Bukolè bwònsò. Patùdi tubanga kuumvwa bintu ebi apa, mbyà mushinga kutùdi bwà kutàngilakù mu mùshindù kampàndà mwaba wutùdi nè mwoyi, nè díbà ditùdi tupicilamù.

⁸ Nè kùkaadi cikondo kampàndà, cìvwa ndyèsè dyànyì dyà kwendakana mu Inde. Nènku ànu kumpàlà kwà mèmè kulwa mu Inde, bàakapeta dikanka dinènè dyà buloba adi. Nènku mvwa mbala mu bibejibeji mu Inde, nè mùshindù wùvwà matùkù matwè ku àbidì kumpàlà kwà dikanka dyà buloba adi kulwadi, bàakamwèka bu nè bàvwa bamanyè nè cintu kampàndà cìvwa cibì, tunyuunyi tukesè tònsò tùdi túsòmbela mu mitanta yà nzùbù minène, nè túsòmbela ku bimanu binène byà mabwe abi. Myaba yàbùngì mu Inde yidi nè bimanu byà mabwe. Nè tunyuunyi tukesè tònsò tìvwà nè maswa ààtù mu yòyi mitanta ayi, twàkuumuka mu bimanu amu. Nè bimunà byònsò bìvwà pa ciibidilu bisanganyiibwa mu nyùngulukilu wa nzùbu minène ayi, mu mapingaja, mu dilèjì, nè lwà ku nyùngulwilu wa bimanu binène byà mabwe abi; munda mwà matùkù matwè ku àbidì kumpàlà kwà dikanka dyà buloba adi, nyama yònsò eyi nè nyuunyi mikesè yàkapàtuka kuya munkaci mwà budimi bwà kiimanyinamù.

⁹ Nudi numòna's, kùvwa cintu kampàndà pa bwalu abu, cyà nè Nzambì ùvwa ùkùba tunyuunyi Twèndè tukesè atu nè nyama Yèndè ayi. Nudi bamanyè's, Nzambì umweumwe uvwa mubalombole mu bwàtù awu, mu matùkù à ku cibangidilu awu, paakabutudiibwàbo ku màyi apu, ku diyiiisha dyà Noà, Nzambì umweumwe awu ùcidi ànu nè mwoyi nè ùkòokèsha leelù ewu, nè Yèyè ùdi nè bukòntononyi Bwèndè bwà bifùkiibwà Byèndè.

¹⁰ Nènku mvwa ndyàmbidila nè: “Pìikalàbí nè Nzambì ùvwa mutàmbe kucyùka tunyuunyi Twèndè tukesè atu, nè bimunà Byèndè nè mìkòòkò, bwà kubisemeja kule kumpàlà kwà dibùtudiibwa kulwadi, ambààyaaku tùng mwàtàmbye kucyùka bânà Bèndè bàdi balediibwe kùdi Nyumà Wèndè, basukula mu Mashì Èndè. Yèyè ùdi ùbacyùka.” Nènku bu mwàkadìmwijàYe tunyuunyi tukesè bwà kupàtukatù mu bisòmbedi byàtù, ndi ngiitabuuja bulelèlè nè Yèyè ùdi ùdimwija bantu Bèndè, leelù ewu. Bu mutùdi tumòna bimanyinu binène byà Dilwa Dyèndè pabwipi apa, ndi ngiitabuuja nè Nzambì ùdi

ùdìmwija bantu Bèndè bwà kudìsangishabo, nè dibiikila dinène bwà kupátuka mu ditùkù dyà ndekeelu edi.

11 Cyena-bwalu cyànyi dilòlò edi cidi nè: *Èkèleeziyà Neàye Kumpàlà Kwà—Kwà Dikènga Dinène Anyi?*

12 Mpindyewu dîbà dikaadi diyè kupîta munùdi nwênù nwela meeji amu. Dîbà dikaadi diyè bikolè be, mu mùshindù wà nè ndi ngèèla meeji nè dîbà dikaadi dimanè kupîta bwà mu Àmèrikè emu. Tukàadi ànu ku ndekeelu kwà njila. Nènku mu dindà emu, pâmvwà nyiisha pa Baabùlònà nè ngiikàdilù yèndè apu, mwawa mwele meeji nè mbifwànyine kwikala bimpè menemene dilòlò edi, bwà kubweja bàmwè bàà mu Bible, bwà kuleeja mùshindù wutùvwà pabwîpì nè Dilwa dyà Mukalenge. Nènku tudi mwà kumòna, twètù nè dîsù dyètù dyà mubidi nè, cintu kampàndà cidi pabwîpì nè kwenzeka.

13 Kùdi di—ditàcishiibwa dinène munkaci mwà bantu, mbikolè bwà kuteeta kwenza ditàbuluja. Èkèleeziyà mmishiilàngàne bikolè, nè ewu nè mukwàbò mmipyàngàne mu maminu, bwà mikàlù yà cyena-màngumba. Nè beena Kilistò mbatàmbe kwikala babindùlùke, mùdìbi bimwèka, nè basalùke. Kàdi, nudi bamanyè's, mbyà bikèmesha's, kàdi Mukalenge wetù wàkamba nè: "Pàabàngà bintu ebi kwenzeka, bwà kubàndisha mèsù," bwà nè bupikudi bwètù bwàseemènyì pabwîpì.

14 Nènku patùdi tumòna luse Lwèndè lunène alu, bu mùdilu lùleejiibwe kutùdi, tumòna byanza Byèndè byà bimanyinu binène nè maalu à kukèma; biine abi, mèsù ètù neàtabalè, mu tusunsa tukesè emu, bwà kubandila. Nè pashiishe cidi citùpèèsha disàmbiibwa dyà kadiyì tuseku edi, bwà kumanya nè Nzambì wa Bible awu ùcidi ànu nè mwoyi leelù ewu. Nè Yèyè mmunangè bàna Bèndè, nè Ùdi ùbàpèèsha didìmwija. Nè aba bàdi nè meeji à nyumà abu, bàdi bàpátuka.

15 Nènku tudi tumòna nè, mu matùkù àvwà Yesù wàkula awu, Yèyè wàkamba nè: "Ànu mwàkadibi mu matùkù à Noà, nè mu matùkù à Lotà."

16 Mpindyewu, ku ndungilu yònsò wa cikondo, Nzambì útù misangu yònsò ànu ufila dibiikila dyà luse kumpàlà kwà dibiikila dyà cilumbulwidi.

17 Mpindyewu nwênù biikàle balongi bàà maalu-malonda, nè mèmè mwawa munkaci mwà kulonga maalu-malonda lumingu elu, nè mbingu yibidi anyì yisàtù mishààle eyi, baataatù Bàà Kumpàlà Kwà Nicée, bàà bwalu-bulonda bwà kale bwà èkèleeziyà pabwîpì menemene nè Nsangilu wa Nicée, nè pashiishe bàvwa munkaci mwà kwenza èkèleeziyà wa Kàtòlikè mu bidimu cinunu nè nkàmà yitaanu byà bikondo byà mîdimà. Nè ndi mmòna nè mu mifundù yà Nicée ayi, anyì Nsangilu wa Kumpàlà kwà Nicée awu, bwà nè bàvwa munkaci mwà kwenza cintu ànu cìmwècìmwè citùdi twenza leelù ewu eci. Kaa, mùshindù mwinè wùdibi byènzekulula's wè!

18 Nè pa kumòna ngiikàdilù wa èkèleeziyà, nè ngiikàdilù wa bantu, nè bimanyinu byà bikondo, nè bifundiibwe myaba yònsò.

19 Mpindyewu, kumpalà mene kwà Nzambì kwenza Yè ní ncinyi cyònsò, mu ndungilu yònsò wa cikondo, Yèyè utu misangu yònsò ànu útuma luse, mwanjèlò, mupròfetà, Mukenji. Nè misangu yònsò, nànsha nànkù, byònsò bitu ànu bidyombòdìibwe. Èkèleeziyà kí mmuswè kuWàkidila to.

20 Noà. Wàkaakula bwà Noà mwab'ewu. Nè wàkayiisha bidimu lukàmà nè makùmi àbìdì. Kàdi nànsha mùvwà mukenji wèndè mwikale luse amu, bantu bààkapanga kutèya ntèmà ku dilongesha dyèndè. Cìvwa ncintu kampàndà cìvwà nè cyà kubàsùngila, kàdi nànsha nànkù kabàvwa baswè kutèeleja to. Kàdi aci cyòci kaciyi cimfwànyì cilenga cyà bikondo byà leelù ebi's wè!

21 Mpindyewu, udi mufwànyine kungambila nè: "Mwanèètù Branham, mmunyi mùdi mwà kwamba nè 'ncilenga,' nè utùzòlela cimfwànyì cyùdi munkaci mwà kutùzòlela eci?"

22 Mbilenga bwalu Mukalenge Yesù ùlwalwa kàtàatakà bwà Èkèleeziyà Wèndè, nènku cidi mmeeji matàmbe bulenga àkaadiku kacya cifùkiibwà cyà Nzambì cyelekù's; bwà kupàtuka mu cimvundù cinène eci nè kubwela mu Butùmbì Bwèndè bubèneshiibwe, mwikalà mununu mwà kwikala nsongà, nè mubèèdi mwondòpiibwe bwà kashidi. Kakwàkwikala kàbìdì tunyinganyinga anyi màsaamà à mwoyi to. Aci cyòci kaciyi cintu citàmbe bulenga cìndi mwà kwelela meeji's! Nè mùshindù mwinè wùdibi bibèneshiibwe bwà aba bàdi bindile cikondo cyà didisanga aci's.

23 Mpindyewu tudi tusangana nè, bu mwàkaleedilà Yesù kale mu matùkù à Noà. Twànjàayi ànu kwalukila cyànyimà, bwalu Yèyè wàkamba nè: "Angàtaayi cileejilu cyà ditùkù adi."

24 Mpindyewu, pàvwà Kaayinà nè Abèlè. . . Pàvwà Kaayinà mushipè Abèlè ke dibà adi Setè kwangatayè kaaba kèndè, tudi tusangana nè Sàtaanà ùvwa munkaci mwà kuteeta bwà kubùtula Dimiinu òvwà nè cyà kulwa adi òvwà Nzambì mulayè, nè Dimiinu dyà mukàjì òvwà mwà kuzaaza mutù wà dimiinu dyà nyòka, nènku Sàtaanà ùvwa ùteeta bwà kubùtula Dimiinu dyà bukalenge adi, nènku kwelayè meeji nè wàkacyenza pàakashebeyàye Abèlè apu, kàdi Nzambì wàkajuula Setè pa kaaba kèndè. Cimfwànyì cilenga cyà lufù nè dibiikà dyà ku lufù dyà Kilistò, nè Dimiinu dyà Bukalenge òvwà òlwa.

25 Dibà adi mbyà musinga wàbùngì bwà kumòna nè mùshindù wùvwà, ku luseke lwà Kaayinà, bàkalwa batèndeledi bàà òò. Nènku bàvwa bantu bàvwà bàyà mu èkèleeziyà; ke mùvwà kàbìdì Kaayinà muntu uvwa uya mu èkèleeziyà awu. Ùvwa ùkuukwila Mukalenge. Wàkiibaka cyoshelu. Ùvwa wa mu èkèleeziyà. Ùvwa ùfuta mabànza èndè. Yèyè ùvwa, mu kaneemu

kònsò bu muntu mwà kumutàngila, bu mwena kwitabuuja mulelèlà.

²⁶ Kàdi kùdi bitùpà ànu bìsàtù byà bantu, mbwena kwamba nè, beena kwitabuuja, beena bupidyà, nè beena kwitabuuja bàà budingìbudìngì. Kàdi's buloba bùcidi ànu bùle tètè naabò dilòòlò edi.

²⁷ Nènku Kaayinà ùvwa ànu munkaci mwà kudingidija kwitabuuja. Nè mu ndelàngànyì yèndè amu kupàtukamù musùmbà munène wà bantu bayi bàà mu èkèleeziyà, batèndeledi bàà dipòkò.

²⁸ Mpindyewu, eci ncyà citàmbe kwikala cyà pabwàci, kàdi nuvwakù bamòne nè ku luseke lwèndè aku nkwàkalwà cisà cyà cishidimùke, cilongè tùlaasà anyì? Bible ngudi ucyamba bitòòke tòò. Wàkamba nè: “Bàvwa bìlbaka, nè bàvwa bènza bintu binène.” Maalu à mamanya àkapàtukila mu ndelàngànyì yà Kaayinà. Nè beena maalu à mamanya banène, nè baa docteurs, nè bantu banène, bààkapàtukila mu ndelàngànyì yà Kaayinà.

²⁹ Piinè apu, ku luseke lukwàbò kùvwa ba—bapèlè, mùshindù wà baabidimè, kàdi bàvwa mbantu bàvwà biitàbùùje nè Nzambi wabò ngwa cyà bushùwà. Éyì Nzambi, wàmbadilaku mu bóbò abu's!

³⁰ Nènku ànu kumpàlà menemene kwà cikondo cyà nshìikidilu kulwaci, kùvwa cibwejàkàjì cinène. Nè luseke lunène lwà èkèleeziyà, kumwèkalù bu nè, bàvwa bacimùne, ànu mùdibi leelù ewu emu, bwà maalu à mamanya.

³¹ Nè cikwàbò cintu cinène: yèyè kwamba nè: “Bàvwa munkaci mwà kwibaka.” Kacya kakùtukù kwànji kwikala cikondo mu maalu-malonda bu mùdi diibaka dyà nzùbu diikàle dinène menemene mùdidi mpindyewu emu to. Ncimwè cyà ku bimanyinu byà cikondo cyà nshìikidilu. Kacya katùtukù banji kupeta cikondo cyà diibaka dyà nzùbu to. Nènku mpindyewu, nànsha mene mu kaacimenga kèètù kakesè aka, ncyèna mwà kupeta mwaba mukùmbàne wà kuya kalemba kàbìdi kàlulù to. Byònsò bìdi ànu macinka à diibaka dyà nzùbu; ànu diibaka dyà nzùbu nè dikùnà dyà bintu. Nènku bu twètù mwà kukàngula mèsù ètù, ndimwè dyà ku makunji à cimanyinu cyà Nzambi didi dìlelea nè ndekeelu ùdi pabwìpì.

³² Nènku tuvwa tuyiisha mu dindà emu, pa tuzùbù tùdi túbuuka nè mìsilè, mùshindù wùdìbo mwà kwimana mu Moscou, nè kuludikila mìsilè lwà munkaci mwà Mùsèèsù Mwinâyì mu Louisville, kàdi kabâyìkù buumuke mu Moscou to. Nè yòyi neyùmbulè disòsù mu buloba, dyà ndòndò wa mètres makùmi àtaanu nè àsàtù, mu cijèngù cyà kilòmèètà nkàmà yìbìdi nè makùmi ànaayi mu nyùngulwilu wabò. Ke bunène bwikalà disòsù adi nàнку awu. Yìsàtù cyanàànà mmifwànyine kubùtula buloba bujimà, kubuumusha mu mpoko wabù. Beena maalu à

mamanya, nudi numòna nè nduseke kaayi lùdici anyi? Nduseke lwà beena lwonji.

³³ Nzambi ùdi ùtèkemena bwà bânà Bèndè kuMweyemenabò bwà byònsò bidibo bàpeta. Kàdi twètù tudi baswè kweyemena cyanza cyà muntu. Mbipiciùbwe nè mèmè mwikàle nè ditèkemena dyànyì diibakila mu Kilistò, ngàngata luseke lwànyì lwà kakùyi tuseku to pa ngàsà Wendè nè luse, kutàmba musumbà kanà wònsò wà bantu bàdi balongè tulaasà bàdi bafwànyine kwenza bulongolodi kampàndà, kwamba nè: “Ewu ke njila.” Kilistò wàkamba nè: “Mémè ndi Njila, Bulelèlè, nè Bukènkè. Nè muntu nànsha umwe kèna ùlwa kùdi Taatù pàdiye kàyi mupicile kùndi Mémè to.”

³⁴ Ki bwà cinyì, nudi mwà kumòna nè, nditùkù dinène dyà dilonga dyà tulaasà. Nditùkù dinène dyà dikokangana pa buloba. Nènku ànu munkaci mwà cyòci aci amu, bàvwa nè cyà kwikala nè buloba butàmbe bunène bwà maalu à mamanya kupita mutùdi naabu mpindyewu emu. Bààkiibaka bipaapu byà misàkà. Katwènakù nè cintu nànsha cìmwè cidì cifwànyine kwibaka cipaapu cyà musàkà to, ní nukààtukù baseemènekù pabwìpì naaci. Nkààdi mufikèku, mu Èjjiipitù, nè bidì mu Mexique abi. Nè kule, mu butùmbùke bwà masangu à njila malondangane bùngiwù, mbifwànyine kwikala mabwe manène àdi mafwànyine kwikala nè bujitu bwà nkàmà yà binunu byà kilò, miibaka kuulu aku kumutù kwà nzùbu munène, wa katankù awu. Nènku mmupempà bipwàngàne mu mùshindù wà nè kakwèna nànsha mwaba bwà kapaaya kupicilamu nànsha; ùvwa mukòshùbwe nè dimanya dyà mpilù. Kaa, ditùkù kaayi dyà maalu à mamanya’s wè! Nènku, kàbidì, nciètèèkiibwe ànu menemene munkacinkaci mwà buloba, nènku dîbà nànsha dyòdi disanganyii bwa penyi, kakwènakù mundidimbi mu nyùngulukilu wàci awu to. Ndi ngèlèla mpatà bwà nè tudikù bafwànyine kukùmbanangana naaci, leelù ewu, mu maalu etu à mamanya à cyena leelù aa.

³⁵ Kàdi Yesù wàkamba nè: “Ànu mwàkadibi mu ditùkù adi amu, ke mwikalàbi kàbidì ku dilwa dyà Mwànà wa Nzambi.” Mpindyewu, nè Noà wàkayiisha bidimu lukàmà nè makùmi àbidì, kàdi, mònaayi nè, bààkamuseka.

³⁶ Mpindyewu, Yesù wàkamba kàbidì, nè: “Ànu mwàkadibi mu matùkù à Lotà, nè ke mwikalàbi mwà kwikala, mu matùkù à Lotà, bàvwa bàdya, bânwa, bàsèlangana, bàsèleshangana, bàkùna, biibaka, bàsùmbisha, bàsùmba.”

³⁷ Kaa, kacya kî nkwanji kwikalakù ditùkù kampàndà, dyà, bungèndàmùshingà be, bu leelù ewu nànsha, ànu bisùmbishidi byà màshinyì mamane kwendesha bùngi cyanàànà nè bikwàbò byònsò. Bipite bùngi, mu mùshindù wà nè, udi mwà kusùmba frigo cidimu eci, nè kumutùdila ndola mitwè ku nkàmà yinaayi anyi yitaanu, nè cidimu cidì cilonda muntu nànsha umwe kàyi

ùmuswa to. Ûkaadi wa cyena kale. Kanwènaayikù bamòne mùyaaya neenù myandà yà bungèndàmùshingà mitàngija dyùlù dyènù ku dikwàta mudimu bu bapika anyi? Udi mwà kusumba kàshinyi cidimu eci, nè cidimu cyàlonda pàmwàpa kaciikàle ànu kimpè bu kawùvwà mwà kusumba cikondo aci, kàdi nekàjimijè ndola cinunu bwalu mbashintùlùle cijikù cyà ku radiateur anyi mbakenzèlekù cintu kampàndà cikesè cyà macimbu. Cìdi ànu diswìshà dyà bintu bìdìbo bapàànyisha, bwà kuuja Bible.

“Ànu mwàkadìbi mu matùkù à Noà, nè mu matùkù à Lotà amu.”

³⁸ Nànsha mùvwàbi nè, musangu wònsò, banjèlò bàakamwènèka, bapròfeta bàakajuuka, nè mukenji wàbò wùtu misangu yònsò ànu ngàsà, luse, nè disùngidiibwa. Mukenji wà Nzambi wùtu misangu yònsò ànu disùngidiibwa, kumpàlà menemene kwà cikondo cyà nshìikidilu; wùkenketaayi mu Mifùndu, mùshindù wàkayiisha Noà disùngidiibwa. Kàdi bàakabàseka nè bàakabèèlulwila, nèbàakabàseka.

³⁹ Nènku ànu mwàkadìbi mu matùkù awu amu, ke mùdìbi kàbìdi leelù ewu. Nènku paùdi upàtuka nè Mukenji, wà nè Kìlistò mmubiike ku bafwè, mwàkalayàYe nè Yèyè ùvwa wà kuDìleeja patòòke. Nènku bàdi bènzela mukenji awu leelù ewu, ànu mwàkenzelàbo Mukenji mu ditùkù dikwàbò adi amu.

⁴⁰ Lotà wàkapàtuka mu Sodomà, nè wàkateeta nè mwèndè mwònsò bwà kufikisha bilongo byèndè ku ditèeleja mukenji wà Banjèlò, kàdi bàakamuseka nè kwamba nè ùvwa wèla bilèlà.

⁴¹ Kaa, cimfwànyì kaayipu cyà ditùkù edi's wè! Paùdi ubàtwàdila Mukenji wà disùngila wà Nzambi, bàdi bamba nè: “Udi welulwila ntèdeleelu. Udi uteeta kutentula cintu kampàndà.” Musumbà wa mùshindù wùmwèwùmwè awu's! Ndìbà kaayì ditùdimu nè mwoyi edi's wè! “Èè, bàdi bèèla meeji nè ànu bòbò nkààyaabo ke bìikalà mwà kusùngidiibwa. Bàdi bèèla meeji nè ànu bòbò ke bàdi bàyiisha Èvànjeeliyò.”

⁴² Yesù wàkamba nè: “Bimanyinu ebi nebìfilè aba bàdi bìtabuuja.” Kì n'Dìyi dyànyì mèmè to. N'Dìyi Dyèndè Yèyè.

⁴³ Nènku mònaayi nè, ndi muswè bwà nùmonè, lùkàsàlùkàsà, nè ndiyiisha dyà mùshindù kaayì divwàdi. Kaa, eci's cìdi citùpisha mwoyi wànyì nè disànka's. Pàndi ngèèla meeji bwà Sodomà nè Gomòlà, bikaavwa bikooyike bikolè, bwà cìdi citàngila nsòmbelu mulenga, mu mùshindù wà nè bantu bakònyàngàle bàvwa myaba yònsò.

⁴⁴ Kàdi ànu pabwìpi menemene nè kabùtù kanène, kàà ndekeelu aku, Nzambi kutùmaYè mupròfeta kuntwaku. Nè ndi pàànyì ngèèla meeji ku bwalu abu, kàbìdi, Yèyè wàkatùma Mwanjèlò kuntwaku, nè ndi muswè bwà nwènu kumòna Mukenji wà Mwanjèlò awu. Abraham, uvwa mulondè njila pàmwè nè

banyààbanyà badyombola bàà Mukalenge abu, wàkasòmba mu cipèèlà mùvwà malaba màtùke.

⁴⁵ Ke Lotà kupwekayè nè kushààlaye mulombodi wa cimenga, nè yêyè ùvwa muntu munène munkaci mwà mpèkaatù. Mbipìciìbwe nè mèmè ncìyì munangìibwe bikolè kùdì bantu to, kàdi mwikàle mu bulongame nè Nzambì. Kàdi Lotà ùvwa mumanyike bikolè, ke kusòmbayè mu misèèsù, ku ciibi cyà cimenga aci. Yêyè ùvwa nzuji wa cìvwà cifwànyine kubwela nè cìvwà kacìyì mwà kubwela. Nènku's ke yêyè awu, ùfila mwoyi wèndè mu masandi, nè mumanyè nè mu cimenga cyèndè bintu byà mùshindù awu bivwa byènzeka.

⁴⁶ Aci ní kî ncimfwànyì cyà leelù ewu's, mu ditùngà dyètù emu; ndongamu kayiyì mikenketa to, lukutukutu lwà mishindù yònsò, lwonji, lukìnu! Kaa, bàvwa mwà kucisùnsula, bu bóbò baswè kucyènza, kàdi kî mbaswè kucyènza to. Kàdi kabèèna mwà kucyènza to, bwalu Nzambì mmwambè nè nebiikalè mùshindù ewu. Bu bóbò ànu mwà kukàngula mèsù àbò nè bàfika ku dyumvwa's wè!

⁴⁷ Kàdi, mònaayi nè, pabwìpi menemene nè díbà dyà bwalu kashondo kulwadì. Abraham nè Sarah, bàvwa basòmbè mwînshì mwà mucì wà lusànga abu, dîngà ditùkù pàvwàbo pambèlu apu, Sarah wàkamòna Bantu kampànda bènda bàlwa. Nè yêyè wàkajuuka mutàngile ku ntentà.

⁴⁸ Ndishìilangana kaayìpu's wè, nè bakàjì bàà ditùkù edi, nè mùshindù mwinè wùvwàbi bifwànyine kwikala bishìilàngàne mu Sodomà mwàmwa's. Pàdì cikondo cyà bantu balùme kulwabò kumbèlu cilwa, bakàjì bàdi bònsò bàvwàla tulàmbà twàbò tukesè twìpi atu, nè bàpàtuka nè bàkakòsa mashinda. Dishìilangana kaayì's wè!

⁴⁹ Kàdi Sarah wàkaya ku ntentà. Nè pààkenzàye nàнку, Bantu aba kulwabò. Ke Abraham kuBàtàngilayè. Bàvwa bàmwèka ànu bu nè bàvwa Bantu bàà mmwènekèlu wa pabwèndè. Nènku Umwe wa kùdìbo ùvwa ùmwèka bu Mwakudi, nènku pààkasòmbàYe nè kubanga kuyiikila nè Abraham. . .

⁵⁰ Abraham kwambayè nè: "Sòmbelàayi apa, nè nènùnùtwàdilé ndambù wa màyi, nè nènukulèku makàsà Ènù. Nènsope dyàmpà dikesè. Nè netùdìlongòlòlè, nè Nudi mwà kudyà dibùlù dyà munyìinyi. Pashiishe Nudi mwà kutùngunuka nè lwendu Lwènu."

⁵¹ Nènku pààkapàtukàye lubilu è kubwela mu cisùmbù cyà ngombe aci, nè kusanganayè kànà kàà ngombe kàà manyi aku, è kukàshebeyayè. Kwambilayè Sarah bwà kwangatayè ndambù wa màmpà bwà kwenza tûtô.

⁵² Ke kuyiikilayè nè Muntu awu. Ngèèla meeji nè, mu mùshindù kampànda anyì kansanga, Abraham ùvwa mumanyè nè Yêyè awu ùvwa Nganyì. Nènku Muntu uvwa mwakudi awu, ùvwa nè nyimà Wèndè mwela ku ntentà. Ùvwa Mùsànjeelà wa ditùkù adi.

Ke Yèyè nè: “Abraham, Nènkumwènekèlè bilondèshile mulayi, wà bidimu makùmi àbìdì nè bitaanu kumpàlà. Ndi mukwenzèle mulayi, nè Nènshaalè naawù.”

⁵³ Kaa, Dìna dyà Mukalenge dibèneshiibwè's wè! Nzambi wàkafila mulayi nè: “Mu matukù à ndekeelu, Yèyè ùvwa mwà kwicikija Nyumà Wendè pa mubidi wònsò,” nè Yèyè neàshaalè naawù. Yesù wàkenza mulayi, nè kwamba nè: “Bintu bìNdi ngènta ebi nenùbyènzè pèènu,” nè Yèyè neàshaalè naawù, bwalu Yèyè ùdi mwakàne.

⁵⁴ Ke Abraham kuMutàngilayè. Ke kwambaYè nè: “Ànu lwà pa dîbà edi mene ngondo wàlonda, bilondèshile mwoyi,” uvwa nè Sarah awu, “Nènkumwènekèlè, nè Sarah neàlelè mwànà ùNdi mulayè awu.” Mpindyewu, Abraham ùkaavwa nè bidimu lukàmà, nè Sarah ùkaavwa nè bidimu makùmi citèemà.

⁵⁵ Nènkù Sarah, paanyimà pàà Mwanjèlò awu, munda mwà ntentà amu, wàkaditwa . . . wàkaseka.

⁵⁶ Ke Mwanjèlò awu, nè nyimà Wendè mukoma, kwamba nè: “Sarah wàsekì bwà cinyi?” Awu ùvwa Musànjeelà awu. Kaa, nudi bamanyè cìndì ngàmba aci anyi? Alu lùvwa ndubuku lwà mùshindù kaayi alu, nè nyimà Wendè mukoma ku ntentà, nè yèyè munda amu? Nènkù kufùkishayè mimwemwe. Nè kwambaYè nè: “Wàsekì bwà cinyi?” Yèyè wàkacimanya. Nè aci civwa m'Mukenji wà ndekeelu kumpàlà kwà Sodomà nè Gomòlà kwoshiibwabì. Mwanèètù, wèwè muWùtèèlèje, dilòlò edi, m'Mukenji wà ndekeelu mpindyewu kumpàlà kwà buloba ebu kwoshiibwabù. Nudi numòna ngiikàdìlù wa Mwanjèlò awu anyi? Mwanjèlò awu ùvwa nganyi? Ùvwa n'Nzambi.

⁵⁷ Vùlukààyi nè, Abraham wàkaMubiikila nè: “Mukalenge.” Nè nkùdimwinu mwab'awu ùdi nè “Elohim, Yèhowàh munène, wa bukolè.” Ùvwa n'Yesù Kilistò mwangàtùlùle mubidi.

⁵⁸ Muntu kampàndà kwamba nè: “Udi muswè kwamba nè ùvwa . . . ? Ùvwa mukapetè mubidi awu bìshi?”

⁵⁹ Mòna's, Yèyè's wàkabiiikila ànu Banjèlò bàbìdì abu. Ke kwelaye ndambù mukesè wa mupùyà, mùshindù awu, ke tupwishipwishi nè kàlisìyumù nè binshidimba kudìsangabì, ke Ngabùdyèla kubwela mu wùmwe, nè Mwanjèlò mukwàbò mu mukwàbò. Nè wàkenza wùmwe Bwèndè Yèyè.

⁶⁰ Dìna Dyèndè dyà cijila dibèneshiibwè's wè! Ndi nè disànkà dyàbùngì, dilòlò edi, dyà kumanya nè Nzambi umweumwe wa Bukolè bwònsò awu, Udi mufwànyine kuDyènzela mubidi wà kusòmbelamù awu, dyeyemena dyànyì dìdì mu Yèyè nè, dìngà ditùkù Yèyè neàjuule ewu ku lufù, mwàkalayàYe bwà kwenza amu.

⁶¹ Nè Yèyè ùdi munkaci mwètù, munkaci mwà kwenza cintu cìmwècìmwè cyàkenzàYe kwàka aci. Kaa, Dìna Dyèndè dyà butumbi adi ditùmbishiibwè's wè; ùdi munkaci mwà kutùpèèsha

didimwija, wàkula neetù, ùtwàmbila bwà kudilongolola. Mu bushùwà bwà bwalu, Yéyè wàkamba nè: “Katancì kakesè aka bàà pa buloba kabààkuMmòna kàbìdì to. Kàdi, nwènú nenùMmònè, bwalu Nèngiikalè neenù, munda mwènù mene, too nè ku ndekeelu kwà buloba.” Ndìbà kaayi ditùdì nè mwoyi edi's wè!

⁶² Mònaayi nè, Mwanjèlò wàkatwàla kapyà awu, ùvwa n'Yéyè Wàkenza cishimà aci awu. Nè twètù bònsò tudi bamanyè nè buloba nebùbutudiibwè, musangu wùdì wùlondà, ku kapyà. Nè Mwanjèlò uvwa mutùmìibwe ku Sodomà nè Gomòlà awu... Tàngilàayi nùmonè cyàkambà Yesù. Kaa, s'cìdì ànu citùpisha musuùkà wànyì nè disànka bwà kufika ku cyòci aci. “Ànu mwàkadìbi mu matùkù à Noà, ke mwikalàbi kàbìdì ku dilwa dyà Mwànà wa muntu.” Cyàkenzà Mwanjèlò awu ncinyi? Ùvwa nè nyumà wa dijingulula. Ke Yéyè kwamba nè: “Ànu mwàkadìbi musangu awu amu, ke mwikalàbi kàbìdì pìikalà Mwànà wa muntu munkaci mwà kubuuludiibwa mu Dyulu.” Nudi nuçimòna anyi? Anji elàayibi ànu meeji, nè, munkaci mwètù mpindyewu mmwimàne Mwanjèlò umweumwe wa Nzambì awu, udi kàyì mungà muntu to ànu Mukalenge Yesù Kilistò, mu mmwènekelu wa Nyumà Mwimpè. Ùdi munkaci mwètù: “Mu ditùkù adi.” Nè Yéyè ùvwa Nzambì, nè ke cìvwa Mukenji Wèndè kumpalà menemene nè kabùtù kulwakù.

⁶³ Mpindyewu netùmonè nè cìvwa m'Mukenji wà disungidiibwa. Wàkapweka nè kuteeta bwà kusungila cisàmbà, kàdi kubèngabò bwà kuMutèèleja.

⁶⁴ Nènku, leelù ewu, ncintu cìmwècìmwè aci mu ditungà dyètù, munkaci mwà bantu bèètù. Nkàadikù mupetè dyèsè dyà kumòna Mukalenge wetù Yesù, mu masangisha, wènza bimanyinu nè maalu à kukèma nè bintu binène. Nè bulelèlà bantu bìimanà pa cibùmbà cyà ku cyambilu apa nè mbamanyè, kakùyì mpatà nànsha mikesè to, nè—nè Nzambì munène, udi kàyì mwà kufwà, udi kàyì mikàlù awu ùdi kaaba aka nè wènza cishimà cyà mùshindù wùmwèwùmwè awu; nè nèbìimane mwaba awu bàcyànkunya bàzòkà, nè bùumuka pa cibùmbà cya ku cyambilu, kabàyi bàbùcyùka to. Kabèèna bàcyùka to.

⁶⁵ Bwànyì mèmè, bìdì bimwèka bu nè, muntu mwikalè nè nyumà wa mùshindù kampàndà kùdiye, anyi Nyumà wa Nzambì munda mwèndè, nènku yéyè mumòne Mukalenge Yesù wènza ànu cyàkambàYe nè Neénzè aci, cìvwa cìfwànyine kusalula mwoyi wèndè mu mùshindù wà nè, kàvwakù mwà kushààla mupùwe ntàntà mule kàbìdì to. Ùvwa mwà kulakusha ditungà kapyà nè Mukenji. “Ànu mwàkadìbi mu matùkù awu,” mwàkambàYe, “ki mwikalàbi kàbìdì.”

⁶⁶ Mukenji awu wàkapàtuka, kàdi bòbò baakawùseka ànu cyanàànà nè baakawùseka, bu muntu kampàndà uvwa munkaci

mwà kwamba bwalu bwà mashimi. Kàdi ùvwa wà luse, nè ùvwa wà ngàsà, nè ùvwa wà disùngidiibwa. Kaa, ekèlekèle!

67 Ke Mwanjèlò kwambayè, mu dindà adi, kùdi Lotà, paanyimà pàà Yèyè mumanè kufila mukenji; Yèyè kwamba nè: “Kolèsha, bànda kùnweku, bwalu ncyèna mwà kwenza cintu nànsha cimwè to too nè pawàfikà apa.” Ndi muswè bwà nùmonè cyòci eci mpindyewu, bwalu bìdi bikèngela bwà twètù kwimakijila kaaba aka, bwà mulongo wà babèèdi. Nuvwakù bamòne civwà Mwanjèlò awu mwambè anyi? “Ncyèna mwà kwenza cintu nànsha cimwè to too nè pawàlwà mwab’ewu.” Civwa ncyini? Civwa mmukenji wà disùngila. Nè kumpàlà kwà kantòlantòlà kàà kapyà kàmwèpelè kumatakù kuumukila mu Dyulu, bìvwa bikèngela bwà Lotà kwikalayè mupàtùke mu Sodomà.

68 Kàdi kumpàlà kwà dimata dimwè dyà mvùla kumatadi difùmina mu Dyulu, Noà wàkabwela mu bwàtù.

69 Ne kumpàlà kwà bómbe bwà mushindà kutuutabù ditunga edi, Èkèleeziyà neàye mu Dyambwibwa, bwà katwilangana nè Mukalenge Yesù. Nè piikalà tuumàlòngò tùdi túbùuka nè mìsilè mbiteèkùibwe, nè nsandu mmyaluja paanyimà, Banjèlò mbiimàne mu bulongàma. Àlèluuyàh! Tujila tunène twà mu Dyulu ntupàte tètè nè misumbà. Nzènzè yidi yònsò myakaja. Misumbà minène yà bimbi yikaadi mimanè kudiibidija. Nyèwù kùdi cikondo cyà Dyalukila Kumbèlu àbìdi àdi panshì aa, bwà Èkèleeziyà wa Nzambi udi nè mwoyi, uvwa mwindile Dilwa Dyèndè awu. Byònsò mbimana kulongolola. Ndi nè disànkà dyàbùngì be. Ndi ngènda ncyòka bikolè be. Kaa, bwà díbà dinène adi!

70 Nè pakwela meeji nè, tuvwa nè citùpà mu ndungilu wa cikondo ewu! Vùlukàayi nè: “Ke mwikalàbi kàbìdi ku dilwa dyà Mwànà wa muntu, piikalà Mwànà wa muntu munkaci mwà kubuuludiibwa mu Dyulu.”

Mpindyewu, vùlukàayi nè, kumpàlà kwà mvùla kumatayè, Noà ùvwa mu bwàtù.

71 Kumpàlà kwà kapyà kumatakù, Lotà ùvwa mupàtùke mu Sodomà. Bwalu, Mwanjèlò wàkamba nè: “Ncyèna mwà kwenza cintu nànsha cimwè paùdi kùyì mwànji kulwa apa to. Ndi nè kakombo mu cyanza cyànyi, bwà kukòka nè kwenza nè tupyà tùlokè tùfùmina mu Dyulu.”

72 Nè ndi ngèèla meeji nè mmwòmò menemene. Mwanjèlò wa kabùtù mmulamìne cyanza cyà Russie, nè bombè bwà mushindà; too nè pàdi Èkèleeziyà ùdisanga, nè Mubidi munènè wùmwèpelè wà Kilistò. “Ncyèna mwà kwenza cintu nànsha cimwè to ànu too nè pawàlwà apa.” Kaa, aci cyòci kaciyi ditwishiibwa dibènesha to!

73 Nènku twètù bamòne bintu byònsò bitèèka mu bulongàme, dyalukila dyà Èkèleeziyà Kumbèlu didi mu bulongàme. Ke Mwanjèlò wa Nzambi ewu mwikàle nè Mukenji wùmwèwùmwè

awu, wènza bimanyinu bimwèbimwè abi, maalu à kukèma àmwèàmwè awu, byònsò bitèèka mu bulongàme. Branham Tabernacle, kùkaadi bidimu makùmi àbìdì nè bítaanu, bu nànkù's, mwawa mwakùle pa cyambilu cimwècimwè eci nè munwàmbile nè bintu ebi nebyènzèkè, òmwè dyà ku matùkù àdì panshì aa. S'ki cyòci eci! Tukàadi ku cikondo cyà nshìikidilu. Ndungilu ùdì kaaba aka. Dìbà dikaadi pabwìpì nè diya dyà Kumbèlu bwà Èkèleeziyà.

⁷⁴ Badyudi, bèèlulwila, bàseka, bàseka bàkenya, mwàkadibo nè Mfùmù Nebùkàndànèèsà nè Beleshààsà amu. Ke mwàkadiye kàbìdì mu matùkù à Noà. Ke mwàkadibi mu matùkù à Lotà. Nè bàdì munkaci mwà kwenza cintu cimwècimwè aci leelù ewu.

“Ncyèna mwà kwenza cintu nànsha cimwè pawikalà kùyì mufike apa to.”

⁷⁵ Ndi muswè bwà nùmonè nè, Lotà wàkapàtuka mu cintu kampàndà cìvwà mwà kumubùtula, nè Noà wàkabwela mu cintu kampàndà cìvwà mwà kumusùngila. Nènku aci's ncifwànyikijilu cyà Èkèleeziyà. Tudi bapàtùkile mu buloba, nè buumùke ku cikondo cyà Elvis Presley eci nè cyà Arthur Godfrey citùdimu nè mwoyi eci. Pàtukàayi mu buloba nè bwelàayi mu Kìlistò! Pàtukàayi mu buloba. “Mbàa pa buloba, nebàbutukè pàmwè nè buloba.” Aba bàdì mu Kìlistò nebàye Kumbèlu nè Kìlistò. “Bwalu aba bàdì balàale tulù mu Kìlistò Nzambì nealwe naabò pàmwè Nèndè pàalwàYe.” Tudi bapàtùke mu maalu à pa buloba, bwà kubwela mu Kìlistò bwà dikùbiibwa. Kaa!

⁷⁶ “Kàdì ncyèna mwà kwenza cintu nànsha cimwè paùdì kùyì mwanji kufika mwaba ewu nànsha.” Mèmè ntu munangè aci. “Ambùlùja! Pààndukà!” Mukenji ùvwà wà lùkàsàlùkàsà. “Ambùlùjà! Ambùlùjà! Pààndukà!”

⁷⁷ Dìna dyà Mukalenge dibeneshiibwè! Yesù wàkalaya nè Èvànjeeliyò ewu neayiishiibwè. Ùkaadi munkaci mwà kuyiishiibwa mpindyewu munda mwà bidimu nè bidimu. Kàdì's ke cyòci eci ku cikondo cyà nshìikidilu, cimanyinu cinènè cyà ndekeelu. Ànu kumpàlà kwà Banjèlò kwelabò lubilà nè: “Lwìjàkàjà,” Yèyè kukudimuka è kwamba nè: “Sarah wàsekì bwà cinyi?” Mwanjèlò wa kabùtù, kwambaYe nè: “Ndi mùmwè bwà mpèkaatù yàbò, nènku Ndi mupweke bwà kumòna nè mbulelèlè anyì kí mbulelèlè.” Kàdì kusanganaYè nè cìvwà bulelèlè. Nè mukenji wùvwà ngàsà, nè luse, nè disùngidiibwa. Kàdì: “Lwìjàkàjà! Lwìjàkàjà!”

⁷⁸ Kaa, nwènù bânà, kanùsòmbi bakonàme nè nwenda nulalakana to. Lwìjàkàjaayi! Lwìjàkàjaayi! Lùkàsà! Cikondo cikaadi pabwìpì. Kunyeemena (penyi?) kupàtuka pambèlu mwàkenzà tunyuunyi tukesè atu, kuumuka ku bimanu binène byà cyena-leelù byà Baabùlòònà ebi, màngumba manène à kale àdì àmba nè: “Kakwèna dishiilangana mu cikondo to.” Èkèleeziyà minène yà kale yà beena lupidyà eyi yidì yàmba

nè: “Cintu pààci nè ndyondopa dyà kùdi Nzambi kacitukù to. Kakwènakù bishimà to.” Umùkaayi ku bimanu abi, bwalu byôbì nebyùpukè. Nebidìshindè mu dibùtuka nè dicimunyiibwa, bwalu Nzambi wanyì ngudi mwambè nàнку awu.

⁷⁹ Nyeemààyi nùpàtuke nùkabwelè munkaci mwà Kàlvariyò dyàmwàmwà's! Piikalà nyuunyi miyè ku micì, wèwè udi uya ku mucì, wèwè pèèbè, mucì awu wùvwà Kilistò mupoopèdiibwekù awu. Mwômò amu mulebelele pankaci pà ngàsà Wendè, nè wèla lubilà kùdi Nzambi too nè pààpità cipeepèlè cicolè aci.

⁸⁰ Lwijàkàjà! Pàandukà! “Lwàkù apa, bwalu ncyènà mwà kwenza cintu nànsha cimwè too nè pawàpàtukà.” Yèyè mmukwindile. Umùkaayi ku bintu byà kale byà cyena leelù ebi. Umùkaayi ku ntèlèviziyò awu pàdi manayi à mùshindù awu àbanga. Umùkaayi. . . Kàngaayi cisanji aci pàdi bìdùndadùndà ebi bibanga. Enzà maalu bu inábànzà. Vwàla bilàmbà bu inábànzà. Enzà maalu bu muntu mulùme. Vwàla bilàmbà bu muntu mulùme. Akùlà bu mwena Kilistò. Ikàlà nè nsòmbelu bu mwena Kilistò. Oshà bilamba byònsò. Lwijàkàjà! Pàtukà! Dibutudiibwa didi pabwìpi. Nzambi muumvwè ku mwoyi kumwenda nè mmucyòke.

⁸¹ Kaa, díbà dikaadi diyè kupìta mùdi wèwè wela meeji amu. Díbà dikaadi pabwìpi. Luse lwà Mwanjèlò, Mwanjèlò wa luse Wàkatùma Mukenji Wèndè awu, ùdi kaaba aka mene dilòlò edì. Nudi nuciitabuujà anyi? Bidi bìkèngela bwà Èkèleeziyà àye kumpàlà kwà cipungu cyà Dikènga dinène anyi?

⁸² Tàngilààyi, Izalèèlà wàkabwela mu Goshènè, nè Èjiipitù kubwelayè mu mîdimà. Èjiipitù wàkabwela mu Goshènè, wàkangaciibwa mu buloba bulaya. Èjiipitù wàkabwela mu mîdimà, nè wàkajiikiibwa mu Mbù Mufwè.

⁸³ Lwijàkàjà! Lwijàkàjà! Pàandukà! Eci ncifwànyine kwikala mpungà webè wa ndekeelu. Kàdi vùlukààyi nè, tudi tumòna mìsilè mishikika. Tudi tuyùmvwà, tudi tuyitàngila mu cibèjibeji. Buloba bujimà bùdi munkaci mwà kuzakala. Cintu cyònsò cívwa Nzambi mwambè cidì munkaci mwà kwenzeka.

⁸⁴ Kàdi bishi bwà bwalu abu? “Mu ditùkù dyàDibuululà Mwànà wa muntu mu Dyulu.” Mwànà wa muntu ncinyi, wàkabuuludiibwa awu? Yesù Kilistò umweumwe awu makèèlèlè, leelù, too nè kashidi. Tàngilààyi mvensà wa 21, anyi mvensà wa 30, nyèyè awu.

Ke mwikalàbi kàbìdi mu matùkù awu pìikalà Mwànà wa muntu munkaci mwà kubuuludiibwa mu dyulu.

⁸⁵ Ncinyi aci? Mikenji eyi yidi. . .Cintu eci kacya kacitukù cyànji kwenzeka to kwambwila pàvwà Yesù pa buloba. Kàdi's ke cyòci eci, ku ndekeelu kwà cikondo cyà bàà Bisàmbà byà bendè. Twánjààyi bì kucitàngila bwà katanci kakesè cyanàànà, nè kwelangana meeji bikolè.

86 Pāvwa Yesù pa buloba apa, Yéyè kààkambakù mùvwàYe mwondopi to. Yéyè wàkamba nè: “Kì m’Mémè udi wenza byenzedi to; n’Taatu Wanyì. Kàdi Mémè ndi ngèza ànu cidi Taatu ùNdeeja bwà kwenza aci.” Yone Munsantu 5.19, Yéyè mmwambè nè: “Bulelèlà, bulelèlà, Ndi nzwàmbila nè: Mwànà kèna mwà kwenza cintu nànsha cimwè mu Yéyè mwinè to, ànu cidiYe ùmòna Taatu wènza aci.”

87 Bu nwènu mwà kumòna Filipò, pàakakùdimunàye mucima dyàmbedi. To . . . PàakabangaYe kumpàlampala mudimu Wèndè wà bwambi, Mukalenge Yesù, cyàkenzekà ncinyi?

88 Twänjàayi kumòna mwikalà Mwànà wa muntu mwà kuDibuulula. PiikalàYe umweumwe awu makèèlèlà, leelù, too nè kashidi, nebikengelè bwà Yéyè kuDibuulula bu mwàkènzàYe makèèlèlà amu. Yéyè ùDibuulula mùshindù wùm wèwùm wè awu, nebikèngele bwà Yéyè kubuulula Mukenji wùm wèwùm wè awu. Mu cimùmà, kàdi tàngilàayi.

89 Pàakalwà Peetèlò kùdiYe paanyimà pàà mudimu Wèndè wà bwambi, Yone Munsantu 1. Peetèlò kuseemenayè kùdiYe. Kàvwa ùbìkidiibwa nè m’Peetèlò díbà adi to; ùvwa ùbìkidiibwa dína dikwàbò. Kàdi pàakaseemenayè kùdiYe, kwambaYè nè: “Wèwè udi Simonà, nè tatwèbè n’Yona.”

Mulòbi wa kale awu kudyàmbedilayè nè: “Wàmmanyi munyi?”

90 Nè pashiishe Filipò, wa ku Bethesda, yéyè pèndè, kunyungulukaye mukùnà, nè kusangana mulundà wèndè kampàndà, Natànàèlà, mwínshì mwà mucì kampàndà, ùsambila. Yéyè nè: “Lwàkù, ùmone utùdi bapetè: Yesù wa mu Nazàlèètà, mwànà wa Yözefù.”

Tàngilàayi mpindyewu mùdiYe muDibuulùle.

91 Ke yéyè nè: “Mpindyewu nkufwànyìnekù kupàtuka cintu cìmpè mu Nazàlèètà anyi?”

92 Yéyè nè: “Lwà ùmonè.”Adi’s ke dyandamuna ditàmba bwìmpè didi muntu kanà yònsò ewu mwà kupèèsha mukwàbò. Kùcisendèki to. Lwàku, ùdìmwènè wèwè mwine. Kaa, twìkalapù nànsha mwà kwikala nè meeji matòòke à mùshindù awu’s wè, leelù ewu.

93 Nè mu bule bwà njila wèndè ewu, kubangayè kumulondela. Mòna’s, yéyè nè: “Peetèlò, makèèlèlà awu, muntu kampàndà . . . Kefà, s’udi mumanyè mulòbi wa kale awu’s?”

“Èyowà’s.”

94 “Wàkaseemena kumpàlà kwà Muntu ewu, nè Wàkamwambila nè yéyè ùvwa nganyi nè tatwèndè ùvwa nganyi.”

“Aa,” mwàkambà Natànàèlà, “mémè ncyèna mumanyè abi to.”

95 Nènku pàakaseemenàye mwaba wùvwà Yesù ùsanganyiibwa awu, mu mulongo mùvwàYe ùsambidila babèedi amu, Yesù wàkamoosha mèsù, ke kwambaYe nè: “Mònaayi, mwena Izàlèèlà mwena munda mùdi kamùyì budimù nànsha.”

96 Mmunyì mwàkamanyàYe nè ùvwà mwena Izàlèèlà? Beena Ngelikà nè bônso, bàvwa bàlwàta mùshindù wà mwomùmwe nè bafwànàngàne. Mmunyì mwàkamanyàYe nè yèyè nè ùvwà mwena Izàlèèlà? Ùvwà Nzambi mumwèneshiibwe mu mubidi. CyàkenzàYe ncinyi? Kutàngilayè nè Kumumònayè.

Yèyè nè: “Udi mummanyè díbà kaayi, Laabi?”

97 Yèyè nè: “Kumpàlà kwà Filipò kukubiikilayè, paùvwà mwînshì mwà mucì apu, Mémè mvwa mukumòne.”

98 Yèyè nè: “Aci’s ncikose bwalu. Wèwè udi Mwànà wa Nzambi. Udi Mfùmù wa Izàlèèlà.”

99 Yesù wàkamba nè: “Bwalu Ndi mukwambile cyôci eci, washishi kwitabuuja’s?” Yèyè nè: “Pashiishe udi mwà kumòna bintu bitàmbe nè eci bunène.”

100 Kàdi cidimba cyà èkèleeziyà cìvwà kacìyì cìitabuuja cìvwa ciimàne mwaba awu. Kaa, ànu nè kaneemu kàabúngì nè lulamatu mwàci mwónsò. Ncyà bushùwà menemene. Bàvwa biimàne mwaba awu nè malonga manène à tùlaasà, malabula manène à tèòlòjì à ku sèminèrè. Kwambabò nè: “Muntu ewu mmwena lubùkù. M’Beelèzèbùlà.”

101 Yesù wàkamba nè: “Nwènù bangàmbe Mémè aci, Nènnùfwilè luse. Kàdi pààlwà Nyumà Mwímpè kwenza cintu cìmwècìmwè aci, díyì dibì òmwèpelè bwà Yèyè awu kadyàkufwidiibwakù luse to, ní mmu buloba ebu ní mu cikondo cìcìlwalwà.”

102 Kùvwà mukàjì mukesè kampàndà uvwa nè òsaamà dyà mashi àlwa munda. Ke kupicilayè mu musùmbà wà bantu awu nè kulengayè cìvwàlù Cyèndè, bwalu wàkadyàmbidila munda mwèndè nè: “Bu mémè mwà kulenga Muntu awu, nèngòndopiibwè.” KuMulengayè. Kuyayè lubilu mu musùmbà wà bantu awu, nè kusòmbayè, anyì cyònsò cyàkenzàye aci.

Ke Yesù kukùdimuka, kwamba nè: “WàNdengi awu nganyi?”

103 Peetèlò kuMutàndishayè. Kwambayè nè: “Tàngilà, musùmbà mujimà ewu’s wùdi munkaci mwà kuKulenga. Bwà cinyì Udi wamba nè ‘WàNdengi awu nganyi?’”

104 Yèyè nè: “Kàdi Ndi muumvwe butekète. Bukolè, anyì dikàndà’s, mbupàtùke mu Mémè.” Ke kukènzakanaYe, nè mèsù awu, too nè mwàkamupetàYe. Mmunyì mwàkacyènzàYe? Aci katwèna bamanyè to. Kàdi Yèyè’s ùdi umweumwe awu makèèlèlà, leelù, too nè kashidi. Nè WàkaDìbuulula kùdi cisàmbà cyà beena Yudà mu mùshindù awu.

105 PàakalwàYe kùdi beena Sàmaalèyà, mukàji awu ùwva ku ciinà cyà mâyi, mukàji mulenga mwena Sàmaalèyà awu's.

106 Vùlukàayi nè, kùdi bisàmbà ànu bisàtù byà bantu. Mbwena kwamba nè, beena Yudà, bàà Bisàmbà byà bendè, nè beena Sàmaalèyà; beena Ham, beena Sem, nè beena Yafètè. Nè beena Sàmaalèyà bàvwa citùpà beena Yudà nè citùpà bàà Bisàmbà byà bendè. Kàdi nudi bavùlùke pàakabangàci, pàakasèlàbo bakàji bààbò, nè bikwàbò.

107 Ke nsongàakàji ewu kubàndayè kuntwaku, citùdi twitabuuja mu ditungà dyètù nè mmukàji wa luumù lubi, kàdi kí ncìwàye to. Mwànà wa balùme wa mu Inde ewu ùwva mwà kunwàmbila cyòci aci. Ewu's m'Mukàndà wà ku esètè, nè nudi nuteeta kuwùbala nè dilonga dyà tùlaasà dyà ku wesètè.

108 Pangàakayà ku Inde, nè kupàtuka ku—ku ndèkè, ku Bombay, kùwva mwèpiskòpò wa èkèleeziyà wa ba-Méthodistes, nè bònsò abu, biimàne mwaba awu. Yèyè nè: “Kùtwàmbidi nè udi mpàndànjlà to, Mukalenge Branham. Twètù tudi bamanyè byàbùngi pa bwala bwà Bible kutàmba munùdi nwènù ba-Yankee mwà kumanya.” Kàdi aci's ncilelèlè. Yèyè nè: “Tuvwa nè Bible kùkaadi bidimu binunu bibidi kumpàlà kwà nwènù kwikala ditungà.” Ncyà bushùwà. Èkèleeziyà wa Munsantu Thomas ùcidi ànukù, mwàkapwekà Munsantu Thomas è kuyiishamù. “Kàdi,” mwàkambàye, “tudi tuumvwa nè Nzambì mmukumwènèkèlè, bwà kuvwija Bible ewu cyàkàbidi nè mwoyi.” Yèyè nè: “Ke citùdi baswè kumanya aci.” Ke cyòci aci. Bàà pa buloba bàdi nè nzala yà dyàmpà didi nè mwoyi.

109 Mukàji wa beena Sàmaalèyà ewu, bu mwàkadiye mwimane ku ciinà cyà mâyi, Yesù kumwambila nè: “Mukàji, Ntwàdiléku mâyi à kunwà.”

110 Èè, kwambayè nè bàvwa nè disungulujangana. Kàdi Yèyè kumumanyisha nè kakùvwa dishiilangana nànsha dikesè to. Nzambì wàkenza, ku mashi àmwèpelè, bisàmbà byònsò.

111 Ke Yèyè kwamba nè: “Bu wíkala mumanyè Mwinè ùdi wakula nendè ewu, wèwè's nguvwa mwà kundòmba Mémè mâyi à kunwà.”

112 Ke muyiiki kutungunukawu too nè pàakabàkulàYe nyumà wendè. Pashiishe kujandulayè cìvwa lutàtù lwèndè. Yèyè nè: “Ndà ùkangàtè bàyeebè kàdi ùlwe mwab'ewu.”

113 Cyàkenzekà ncinyi pàakambilàbo mwena Yudà cyòci aci? Mwena Yudà wàkamba nè: “Wèwè udi Mwànà wa Nzambì.” Ncyà bushùwà.

114 Cyàkenzekela mwena Sàmaalèyà ncinyi pàakamwambilàbo cyòci aci, wamba nè: “Ndà ùkangàtè bàyeebè kàdi ùlwe mwab'ewu”?

115 Yèyè nè: “Mukalenge, ndi njingulula nè Wèwè ewu udi Mupròfètà. Mpindyewu, tudi bamanyè nè pàalwà Maasiyà, udi

ubiikidiibwa nè n'Kilistò awu, pààlwàYe, Yéyè neàtwámbilè maalu aa. Kàdi Wèwè udi nganyi?"

Yéyè nè: "Mémè ke Yéyè udi wakulangana neebè ewu."

116 Kubwelayè lubilu mu cimenga, è kwambayè nè: "Lwâyì, kanùmonàâyì Muntu udi mungambile bintu bìndì mwenzè. Kì m'Maasiyà awu anyi?"

117 Nè Yéyè kààkenzakù aci to, musangu nànsha ùmwè, bwà muntu wa bàà Bisàmbà byà bendè. Bwà cinyi? Wàkacishiya too nè ku ditùkù edi. Ke cyàkambàYe apa nè: "Mu matùkù ìkalà Mwànà wa muntu mwà kuDìbuulwila mu Dyulu awu." Ùdi munkacì mwà kuDìbuulula mpindyewu, kùdi Èkèleeziyà, bwà luse. Musangu wàlondà wùdiYe ùDìbuulula, mmu dibùtuka, kùdi aba bàdi babènge Mukenji abu.

118 Nzambi ìkalèku nè luse bwà...kutùdì, patùdì tusambila bwà katanci kakesè cyanàànà apa. *Bitùulùbitùulù Nè Kalolo Kònsò*, Mwanèètù wa bakàji Gertie, bu wèwè mwà kuswà.

119 Ndi ànu ndikonka, dilòòlò edi, mùndì ndyùmvwà bibì bwà nwènù kwikala biimàne ku luseke lwà cimanu. Nè ndi mwà kuumvwà dizùkà dyà myoyi yènù's. Ndi ànu ndikonka, kaa, bu nwènù mwà kwikala nè meeji matòòke kunùdi nwènù biine nè kùdi Nzambi, bwà katanci kakesè cyanàànà.

120 Ncyà bushùwà nè nudi baswè kulwijakaja bwà kupàtuka mu cyòci eci anyi? Kùdi Muntu kampàndà mu bwikadi dilòòlò edi, udi ubiikidiibwa nè m'Mukalenge Yesù. Yéyè ngudi nè tikè bwèbè wèwè, nè cyònsò cidì cikèngela bwà wèwè kwenza cidì ànu kuMupèesha mwoyi wèbè cyanàànà. Yéyè neàwùsukulè mu Mashì Èndè Sungasunga, nè neànùkezùlè ku mpèkaatù yònsò nè mpatà, nè neànùfikishè mu Dyulu Dyèndè pààlwàYe.

121 Nènku mbifwànyine kulwa kumpàlà kwà dindà, tuzùbù tùdì túbùuka atu. Kakwèna cintu nànsha cimwè to mùdi maalu à mamanya àmba...Nudi nucyùmvwà, ditùkù dyònsò edi, ku tudyòmbà, pàdìbo ku ntèlèviziyò, pàdìbo bèèla maalu à mamanya aa nkonko apu. Bàdi bàmba nè: "Kakwèna cintu cyàpangisha buloba ebu bwà kutayishiibwabò mu kasunsa kanà kònsò to." Bìdi ànu bikèngela kunwà kwà ngalaasa wa maalà à Vodka, nè nebàkokè ànu kakombo, nè bwalu pààbò bumba bùjika.

122 Tùlwijakaja! Mukenji ngwà lùkàsàlùkàsà. Lwijakaja! Pàndukà! Nyeemàâyì lubilu bwà kusùngila mwoyi wènù! Pàtukàâyimù. Pàtukàâyì mu Baabùlòonà wa cyena-leelù ewu. Pàtukàâyì mu bimanu abi. Kwènàku mwà kuumvwà cintu kampànda cikòka munda mwà mwoyi wèbè amu anyi? Pawikalà wa nyumà bulelèlè, nè Nzambi mwikale wakula neebè's! Cyà bushùwà, pùikalàYe wàkaakula nè tunyuunyi tukesè atu, Yéyè's ùdi mwà kwakula neebè.

123 Udikù mwà kwela cyanza cyèbè muulu kùdiYe anyi? Katwèna nè mwaba wà kutèeka bantu ku cyoshelu eku to. Kàdi bu wèwè ànu mwà kwela cyanza cyèbè muulu, nè kwamba nè: “Nzambi, ikàlàku naanyi luse.” Nzambi àkubènèshè, mwanèètù wa balùme. Nzambi àkubènèshè. Kaa, ekèlekèle! Mu nzùbu mujimà emu. Ncyèna mumanyè nè kùdi byanza búngì kaayi to. “Ikàlàku naanyi luse, Èyi Nzambi. Cyànyi cyanza ncyôci eci. Ndi muswè kupànduka, Mukalenge. Kumpàlà kwà dindà, ndi mufwànyine kuumvwa lubilà lukolè, ntàngila pambèlu nènku ke myanzankòngòlò eyi munkaci mwà kutàmbakana mu maulu, Mwànà wa muntu mufwànyine kwikala wènda ùlwa.”

124 Nditùkù kaayi dyà dikwàcisha bwôwà, dyùdi mupangile mpùngà webè. Wèwè uvwa mwimàne ànu mu nyùngulwilu wa ekèleeziyà webè, kí mmwômò anyi? “Kaa,” múdi wamba, “maman úvwa wa mu cikampàndà.” Abi’s mbímpè, mwanèètù wa balùme. Abi’s mbímpè, mwanèètù wa bakàji. Kàdi lupàndu lwà maman kalwàkukubwejamù to. Maman wàkadi nè mwoyi mu ditùkù kampàndà, kàdi wèwè udi nè mwoyi mu dikwàbò.

125 Umvwa Mukenji wà Mukalenge, nè umvwa didimwija dyà Nyumà. Úvwa n’Nyumà wa mùshindù kaayi, Ewu wàkajingulula mùvwa Sarah ùseka munda mwà ntentà awu? Mwanjèlò wa Mukalenge.

126 Mpindyewu nè mitù yènù miinyika, ndi muswè kusambidila muntu nè muntu wa kunùdi.

127 Cyùdi mwenzè ncinyi pawèdi byanza muulu apu? Udi wamba nè: “Aci cìvwa cyùmvwija cintu kampàndà anyi, Mwanèètù Branham?” Èyowa bushùwà. Wèwè mwikàle wambilamù, cìvwa cyùmvwija dishiilàngana pankaci pàà lufù nè Mwoyi. Mukenji ngwà lùkàsàlùkàsà. Kwènàku mwà kwela cyanza cyèbè muulu mpindyewu mene anyi? “Ikàlàku naanyi luse, Nzambi, kùndi.”

128 Nzambi àbènèshè mwànà mukesè wa bakàji awu. Nzambi àbènèshè inábànzà awu. Nzambi àkubènèshè; wèwè, mwanàanyi wa balùme; wèwè, wèwè, nsongàalùmè. Bânà bakesè bàdi banyùngùlùke ku cyoshelu biikàle nè byanza byàbò bikesè byela muulu. Èè, bènèshààku myoyi yàbò mikesè!

Wèwè udi wamba nè: “Kí ncidibo baswè kwamba to.” Kaa, èyowà’s, s’ki cidìbo bàmba.

129 Yesù wàkamba nè: “Lekèlaayi bânà bakesè bàlwe kùNdi, kanùbàkandiki to, bwalu bukalenge bwà Nzambi mbwà bàdi bu bóbò aba.” Bìdi mwà kwenzeka nè kabàshàadi nè mwoyi too nè ku dikola to. Kàdi, cyènzàbo. Kabàadyàku. . . Nebàpàndukè, pàmwàpa, bintu binène byònsò bìvwà bikèngelà bwà twètù kupicilamù abi.

130 “Nzambi, ikàlàku nè luse!” Panùdi nwela byanza muulu apu, bìdi bìleeja nè kùdi cintu kampàndà munda mwènù amu cidì cyangàte dipàngadika. Mubidi wèbè wùvwa mufwànyine kwikala mufwè bu kakùyì cintu kampàndà munda mwèbè amu,

cìvwà cyàmba nè: “Elà byanza muulu.” Aci’s cìvwa n’Nyumà. Dìbà adi elà cyanza cyèbè muulu. Nzambi ngudi mucijaadike. Nyumà mmukufikishe ku dyela cyanza cyèbè muulu.

¹³¹ Nzambi ànùbènèshè, nè bânà bakesè bônso bàdi paanyimà pààpa. Bânà bakesè, bàà bafiike abu, bôbò pààbò, lwà kuntu kwàka, Nzambi àbènèshè myoyi yènù mikesè ayi, munanga wanyi. Nzambi mmunùngè. Bushùwà’s.

¹³² Netùpatukè mwab’ewu, dimwè dyà ku matùkù àdi panshi aa. Ncyèna mumanyè nè necyènzekè dìbà kaayi to, kàdi ci—cìlwalwa. Tùlwijakajàayi, nè lùkàsà lwónso, bwà kubwela mu Bukalenge’s! Wèwè udi wamba nè: “Èè, s’nkaadi muumvumvwe aci kwónso eku.” S’udi mufwànyine kucyùmva wèbè musangu wà ndekeelu, kàbidi’s. Lekèlè eci ciikalè cikondo.

Nzambi àkubènèshè paanyimà apu, wèwè nsongàakàji.

¹³³ Ndaayi kule nè cintàkanyi cyónso cyà kale cyà cyena-leelù eci, bimanu byà kale ebi. Byónso abi nebitonkokè. Maja ónsò à bìdùndadùndà nè bintàkanyi byónso ebi nebibutukè pàmwe nè buloba. Kùbwedikù mu maalu à pa buloba to. Pàtukàmu. Nzambi ùdi ùlwa bwà Èkèleeziyà Wendè. Yèyè mmukusungùle, ke bwà cinyi Ùdi wàkula neebè. Mukenji ngwà lùkàsàlùkàsà. Lwàkù lùkàsàlùkàsà!

¹³⁴ Mpindyewu, patùdi tusambila apa, ikàlà nè meeji matòoke mpindyewu nè ùlomba Nzambi bwà ikalèku neebè luse.

¹³⁵ Mukalenge mubènèshìibwè, nkufwànyìnekù kwikala bantu kaaba aka bàtù kacya kabàyikù bânji kumòna bwenzeji bwà makolè à Nzambi kwónso eku, kàdi cintu kampàndà munda mwà mwoyi wàbò ncyambè nè: “Elà cyanza cyèbè muulu. M’Mémè.” Nènkù bàdi bàmòna nè kùdi dibìikila dyà lùkàsàlùkàsà. Bôbò, bàdi nè meeji bùngì bukùmbàne bwà kukènzakana nè kumòna nè kùdi cintu kampàndà pabwìpi nè kwenzeka.

¹³⁶ Bânà bakesè, bààbùngì bàà kùdìbo bàvwa beelè byanza byàbò muulu. Nzambi, ikàlaku naabò luse. Bàbùngì bàà ku banunu nè bakùlumpè, mbèlè byanza byàbò muulu. Bansongà mbeelè byanza byàbò muulu. Bàdi bàjinga luse, Nzambi. Nè ndi nè disànkà dyàbùngì dyà kumanya nè dibuulula dyà kumpàlà dyà Kilistò didi luse; dibuulula diibìdi neilumbulwidi. Èyi Nzambi, twasàkidila bwà aba bàdi bangàte luse dilòlò edi, njila wa luse. “Bàà disànkà mbeena luse, bwalu nebàpetè luse. Bàà disànkà ng’aba bàdi nè nzala nè nyòotà yà bwakàne; nebùujiibwè.”

¹³⁷ Kenkèsha makènkè àbò, dilòlò edi, Mukalenge. Swàkù bwà bìikalè tùndeyi tùdi tutèeka pa kakùnà, tùdi katùyi mwà kusokokiibwa to, kàdi bàfilakù bukènkè kùdi bilongelu nè myaba yìkalàbo mwà kuswikakana naayi, kubangila ku mpindyewu. Enzàku nànkù, Mukalenge. Swàkù bwà bìikalè makènkè ikalà mwà kukenkesha bwà butùmbi bwà Nzambi. Bàbènèshekù.

138 Nènku mu ditùkù kampàndà, mu buloba butàmbe bwímpè, Mukalenge, swákukù bwà tütwilanganè bônso banyungülükile mèèsà manène à Nzambì awu, ku Didyà dyà Dibanjì adi. Lamàku Nyumà Webè pambidi pèètù, Mukalenge. Bèneshàku aba bàdi biimàne ku myelelu yà bimanu, nè mu lutanda nè mu nyungulukilu amu, bàdi beelè byanza byàbò muulu, nè bikwàbò. Ikàlàku naabò, Mukalenge. Mbiimàne kuulu, nè tukùlàkàjì tubàkwàte ku mikòlò, dilòòlò edi. Kàdi, ikàlàku nè luse. Enzàku bintu ebi.

139 Bàdi mamuma à Mukenji ewu mukesè wà dilwijakaja dilòòlò edi. Ndi ndòmba bwà banjèlò bàà Nzambì bàcìvwijèku cilelèlè menemene mu myoyi yàbò, bwà kabàpangidikù—kabàpangidikù nànsha cintu nànsha cìmwè cyà ku Cyòci aci to. Nènku bóbò mmamuma, nè mémè ndi mbàfila Kùdi. Nè Wèwè udi ubàfila kùdi Yesù, bwalu mmapà Èbè à dinanga kùdiYe. “Muntu nànsha umwe kèna mwà kubànyènga mu cyanza to, bwalu muntu nànsha umwe kî mmunène kutàmbe Nzambì to.” Nènku ndi ndòmba bwà Ûbàlamè mu dikùbiibwa dyònsò too nè pààlwà Yesù bwà bwalu bwàbò.

140 Swàkù bwà bakwàbò abu bàlwijakajè, Mukalenge, nè bàlwijakajè, bwalu Mukenji ngwà lùkàsàlùkàsà. Tudi nè cyà kupàtuka lùkàsàlùkàsà kumpàlà kwà kabùtù kulwakù. Nènku mpindyewu, Mukalenge Nzambì, ndi ndòmba bwà Wèwè kutùmakù Mwanjèlò Webè, Yèyè umweumwe uvwa musòmbe nè Abraham awu. Enzàku nànkù, Mukalenge. Nè ùvwa mwà kwamba cìvwà Sarah wènza, paanyimà mu ntentà. Nè awu ùvwa Mwanjèlò wa Cipungidi. Awu ùvwa m’Mwanjèlò wàkatwàla luse kumpàlà kwà kapyà kumatakù. Pa dîbà kanà dyònsò edi, kapyà kàdi mwà kulòka mpindyewu, tupwishipwishi tùvwà mwà kupandulula buloba bujimà bipese bibìdi. Swàkù bwà Yèyè àlwe dilòòlò edi àtùpè luse, Mukalenge, bwalu tudi tulòmba nùnkù mu Dìnà dyà Yesù. Amen.

141 Kaa, kùdi cintu kampàndà pa bìdi bitàngilà Èvànjeeliyò mubènesha wa kale ewu, Ùdi ùmwèka bu ne ùdi ùkukezula. Ndi muMunangè.

142 Twìmbààyi aci musangu wùmwè nè: “Bitùùlùbitùùlù nè kalolo kwònsò Yesù ùdi ùbìikila.” Bantu bònso, twèlààyi ànu byanza muulu kùdiYe. Nudikù mwà kucyènza anyi?

Bitùùlùbitùùlù nè kalolo kònsò Yesù ùdi ùbìikila,
 Ùkubìikila wèwè nè mémè,
 Nànsha twètù benzè mpèkaatù, Yèyè ùdi nè luse nè difwà dyà luse,
 Difwà dyà luse bwènù nwènù difwà dyà luse bwànyì mémè.

Alùkila kumbèlu, alùkilà kumbèlu, (Dikàngile wèwè ànu mu nzùbu nè Kilistò mpindyewu.)

Nwènu bàdi bazengèle, alùkilaayi kumbèlu;
 Nè mwèndè mwònsò, nè kalolo kònsò, Yesù ùdi
 ùbìikila,
 Ùbìikila, Éyi ngènzàmpèkàatù wa yààya,
 alùkilà kumbèlu!

¹⁴³ [Katùpà kàà mukàbà wà mèyi munda mutupù—Muf.]... kacya ncitukù mwânji kubwela mu òmwè dyà ku masangisha ètù à dyondopa aa kwònsò eku to, tùmònebì byanza byènu. Kacya ncitukù mwanji kwikala mu masangisha to? Abi's mbimpè. Ndi nè disànkà dyàbùngi dyà kwikalakù neenu kaaba aka.

¹⁴⁴ Mpindyewu, ncyèna ngàmba mündi mwondopi to. Ndi ngàmba nè Yesù kí mmufwè to, kàdi Ùdi nè mwoyi. Mémè ncyèna mwondopi to. Kakùtukù bwondopyanganyi to. Kilistò ùkaadi mumanè kukwondopa. “Ku mibùndàbùndà Yèndè wèwè wàkamana kwondopiibwa.”

¹⁴⁵ Kàdi ndi muswè kunùkonkakù cintu kampàndà nwènu bapyabàpyà bàdi balwè. Mpindyewu, pàmwàpa utu uya mu èkèleeziyà kampàndà. Bààbùngi bàà kunùdi bàvwà belè cyanza cyènu muulu ànu díbà adi abu, bàvwà beelè cyanza cyènu muulu bwà disambila, kùkaadi katanci. Nwènu kanùyì nè èkèleeziyà wa basungùle nànsha umwe to, tudi tunùjingila difika dilenga mu Branham Tabernacle emu, mwaba wùdi Mwanèètù munanga Orman Neville ewu, muntu wa difwàndà dyà Nzambì udi kàyì ùlongesha cingà cintu to ànu bulelèlè, bwà mu Bible. Tudi tunùjingila difika dilenga ku bwobùmwe bwètù. Tudi ànu . . . Kí ndingumba to. Tudi ànu èkèleeziyà kaaba aka, bwobùmwe kampàndà. Twètù tudi ba-Méthodistes, ba-Baptistes, ba-Presbyteriens, beena Mpenta, ba-Luthériens, tudi bònsò. Tudi beena Kilistò bàdi bakunangè. Nènu tudi tulòmba bwà nwasanganakù nè nwènu . . . Panwikalà kanùyì mwà kulwa mwab'ewu to, nùpetèku èkèleeziyà mwimpè mwikale kwènu kumbèlu, mwaba kampàndà, mwaba wùdìbo cyà bushùwà bàyiisha Èvànjeeliyò, nè bwà nwamòna mwà kudìshiiibwa kùdi Nyumà wa Nzambì.

¹⁴⁶ Mu nyùngulwilu mwònsò, mu nzùbu mònsò emu, dilòlòlò edi . . . Mukalenge Yesù yèyè mubiike ku bafwè, nè mémè mwà munwàmbile Bulelèlè, díbà adi Nzambì mmwenzèjiibwe ku Díyi Dyèndè, bwà kudìvwija nànkù. Nwamònu anyi?

¹⁴⁷ Kaa, kanùciinyi bwà kuCyèyemena to. Anyi aci cidi m'Bible, M'Bulelèlè, anyi Kacyèna Bulelèlè to. Cyòci kaciyi Bulelèlè to, Ke mùseeswishanganyi mutàmbe bunène ukààdikù kacya mufùndiibwe, bwalu m'Museeswishe bààbùngi. Nkààdikù mwimàne, misangu yàbùngi, nè Koran mu cyanza cimwè nè Bible mu cikwàbò, kumpàlà kwà ba-Mùzùlùmanyi, kàdi kwamba nè: “Umwe mmulelèlè nè mukwàbò ngwà mafi.

Nzambì udi Nzambì mulelèlà awu, àkulè.” Kùcìinyi to. Yèyè kàadyàkukulekelaku to. Yèyè kàadyàkukushiyaku to.

¹⁴⁸ Mpindyewu, Mukalenge Yesù, pàvwàYe pa buloba apa, byenzedi byàkenzàYe, bitùdi tufùma ku ditèèla ebi, Wàkalaya nè Yèyè nealwe cyàkàbìdi kumpàlà kwà ndekeelu wa cikondo nè neenzè bintu bìmwèbìmwè abi. Wàkamba nè Yèyè ùvwa mwà kucyènzela ku Èkèleeziyà Wendè. Mpindyewu, Yèyè wàkamba nè: “Mémè ndi Mwonji wà mvinyò, nwènù nudi matàmbà.” Mpindyewu, Mwonji wà mvinyò kawùtu wùkwàma mamuma to. Matàmbà ngàtù àkwàma mamuma.

¹⁴⁹ Mpindyewu, cyòdi ciikàle mwonji wà diwòji, nedikwamè mawòji. Cyòci ciikàle cibimbi, necikwamè bibimbi. Cyòci ciikàle mwonji wà diwòji, newùkwamè mawòji. Wòwò mwikàle mwonji wà tumuma twà mvinyò, newùkwamè tumuma twà mvinyò.

¹⁵⁰ Cyòci ciikàle mwonji wà mvinyò wà bwena Kilistò, newùkwamè Kilistò, Mwoyi wà Kilistò, byenzedi byà Kilistò. Nwamònu anyi? Dìbà adi, nyumà yètù yidi nè cyà kupèèbwa bukolè kùdi cintu kampàndà.

¹⁵¹ Ndi nè disànkà dyàbùngì dyà kwikala munda Mwèndè, dilòòlò edi. Kanwèna bamanyè to, nwènù kasumbu kakesè kàà mìkòòkò aku, mùshindù mwinè wùdìbi bìmfikisha ku didyùmvwà's, bwà kumanya kaaba aka nè, nkàadi nè bidimu makùmi ànaayi nè mwandamukùlù, muntu mukùlakàji. Kàdi ndi muyiishe mpindyewu kùkaadi bidimu makùmi àbìdi nè mwandamutekète. Makaanya àànyì àdi munkaci mwà kukòbama. Kàdi, kaa, ndi ngùmvwà nè ncicyenà nsongàalùmè mukèsè uvwa nè ciibidilu cyà kunàya mààbì pambèlu pàapa mu mùsèèsù to. Kàdi kùdi cintu cìmwèpelè cìndì mumanyè bulelèlà, ndi musadidi Wendè. Mvwa mwà kuswà cyòci aci kutàmba byònsò bìndì mumanyè. Bwalu mbwìmpè kaayi bùdi cintu kanà cyònsò eci mwà kungenzela?

¹⁵² Ndi muteete kwikala nè meeji matòòke kumpàlà kwènù. Ndi muteetè bwà kwenza cyònsò cìmvwàku pàànyì mwà kwenza aci bwà kwikala nè meeji matòòke nè mwakàne nè mulelèlà, mu bwikadi bwènù nè mu bwikadi bwà Nzambì, bwalu ndi mumanyè nè Yèyè ùtu ùtùtàbaleela dìbà dyònsò. Mpindyewu, bu mémè mwà . . .

¹⁵³ Ndi nzwàmbila mpindyewu. Dyiisha dikesè edi dilòòlò edi, ndi muteetè bwà kwimanyika kumpàlà kwà dìbà, kàdi ndi ndòmba bwà Nzambì àteekèku bikwàbò bìdì bìshààla abi mu mwoyi wènù. Lwijàkàjàayi! Lwijàkàjàayi! Lwijàkàjàayi! Pàtukàayi mu Baabùlòonà, nè lùkàsà nè mwènù mwònsò. Kanùshàadi mu byà pa buloba to. Umùkaayi mu lukutukutu alu. Pàtukàayi! Pàtukàayi mwab'ewu, badishikàmìne, nè Kilistò. Tàpulukaayi nè bintu abi. Bwalu kanwèna bamanyè nè ndìbà kaayi diikalà buloba ebu kabùyì mwà kwikala cìngà cintu to ànu lupwishì lushàalepu to, ànu magazè, nè buloba bwà kale

ebu butùdisha bushààle ànu tusùnsukilà. Bidi mwà kwenzeka kumpàlà kwà disangisha edi kujikadi, nè kí mbifwànyine kubèngangana nè Mifundu to nànsha kakesè. Ncifwànyine ànu kuuja Mifundu. Èvànjeeliyò mmuyiishìbwe. Ke Mukenji wà ndekeelu wùlwalwà ewu.

¹⁵⁴ Mpindyewu, kanùkèbi bintu binène mu matùkù àcilwalwà to. Àmèrikè ùkaadi mumanè kwenza mpèkaatù mupicishe ditùkù dyèndè dyà ngàsà. Ncyà bushùwà menemene. Nùcifundaayi mu Bibles yènu bwà nùjandulè nè ndi mubingè anyi ndi mupùile. Ùdi wènda ùpweka kwìnshì kwà cibàndilu mpindyewu kùkaadi bidimu bibidi.

¹⁵⁵ Billy Graham mmwambè, ku didyà dyèndè dyà mu dindà ànu àbidi àdi panshi aa. Wàkakwata Bible mwela muulu. Yèye nè: “S’ki cipiminu ncyòci *eci*. Pòlò ùvwa ùya mu cimenga nè ùkùdimwisha muntu umwe mucìma, wàlukila cidimu cìvwà cìlondà nè kùvwa makùmi àsàtù.” Yèye nè: “Mèmè ndi mbwela mu cimenga ngenza ditàbuluja, dyà bantu binunu makùmi àbidi bàdi bakùdimùne mucìma, kàdi ngàalukila ngondo yisambòmbò kàdi ncìyi mwà kusangana pàmwàpa makùmi àbidi to.”

¹⁵⁶ Mbwalu kaayi ebu? Kùdi ànu mishipa bùngì kampànda mu dijiba amu. Kùdi ànu bantu bùngì kampànda bàdi Nzambi mumanyè kumpàlà kwà difukà dyà dyulu nè buloba, nè biikàle badyànjlila kulongolwela Mwoyi wà Cyendèlèlè. Pààbwelà wà ndekeelu awu, aci necikòse bwalu.

¹⁵⁷ Kùvwa ànu nyuunyi bùngì kampànda yàkabwela mu bwàtù amu, ànu nyama mishilèshilàngàne bùngì kampànda yàkabwela mu bwàtù abu. Kàdi ciibi kukàngiibwa, kùdi Nzambi, kàdi kushiyaci bakwàbò bònso pambèlu, nànsha mwàkateetàbo bwà kubwelamù amu.

¹⁵⁸ Nènku mulundà wanyi munanga, pawikalà kùyì munda to, bwelà mpindyewu mene, pàcidi Nzambi munkaci mwà kubiikila apa, bwalu biibi byà luse mbifwànyine kukàngiibwa, bwà bàà Bisàmbà byà bendè, pa díbà kanà dyònsò. Mpindyewu, nènku mpindyewu cindi ngèna, mpindyewu, neciikale nè... Cindi ngamba mpindyewu *eci* . . .

¹⁵⁹ Ndi mwakùle, nè mèyi àànyi, bu nè mvwa muyiishe munda mwà mèbà nè mèbà, kacìvwa mwà kuumvwija cyàbibidi cyà díyi dimwèpelè dyà kùdi Mukalenge wetù munanga Yesù Kilistò nànsha. Mpindyewu, kàdi cindi muyiishe, anyi ndi mwambe Bulelèlè anyi mashimi. Piiikalàbi nè ndi mwambè mashimi, Nzambi kàakwikala nè cyà dyenzamù to. Piiikalàbi nè ndi mwambè Bulelèlè, Nzambi neìmanè paanyimà pàà Díyi Dyèndè.

Nudi bambe nè mbùngì kaayi? Nudi baabànye twartà makùmi àtaanu anyi?

¹⁶⁰ Nènnùleejè bwà cinyi bidi bìkèngela bwà twètù kwabanya twartà, panùdi nè masangisha à dijingulula. Ncyèna ngamba nè Yèye neàcyènzè to. Yèye mmufwànyine kubènga kucyènzà.

Kàdi ndi muswè bwà nwênù kwikala nè meeji matòòke kùndi. Mbanganyi mwab'ewu bàdi baswè kubwela mu mulongo mpindyewu? Elàayi byanza byènù muulu, mu nzùbu mujimà, mwaba wònsò wunùdi awu. Muntu yònsò mu nzùbu emu udi muswè kubwela mu mulongo, elàayi byanza byènù muulu. Mpindyewu mbanganyi bàdi bafwànyine... Nganyi udi mufwànyine kwikala wa kumpàlà? Nwamònu anyi? Kwèna mufwànyine kucyènza to. Bikèngela twàbanyè twartà, bwà kulama mu—mulongo.

¹⁶¹ Mpindyewu, mmwabànyè twartà makùmi àtaanu. Nènku tùbiikidilàayi ànu ku nseke yònsò, kuumukila ku mushiki wà twartà wàwa, nènku aci necifile mpùngà kùdi muntu yònsò bwà kulwayè.

¹⁶² Mpindyewu, kí ncìdi cyènzekà *kaaba aka* to. Ncìdi cyènzekà *kaaba aka* aci. Nwamònu anyi? Kí nnè, kundenga mèmè to. Cidi nè, kuMulenga Yèyè. Mbanganyi bàdi bamanýè nè Dipungila Dipyadipyà, Mukàndà wà Ebèlù, mmwàmbè nè mpindyewu mene, nè: “Kilistò m'Mwakwidi Munène udi mwà kulengiiwba kùdi dyumvwa dyà mateketa ètù anyi”? Èè, mmunyi mùdi mufwànyine kumanya nè udi muMulengè? Ku nè, Yèyè ùdi wàndamuna, ànu mwàkenzàYe amu. PìikalàYe umweumwe awu makèlèlèlè, leelù, too nè kashidi, Ùdi nè cyà kuDimwènesha ànu byà momùmwè nè mwàkenzàYe makèlèlèlè nè kashidi. Pa nàнку, nudi numòna mukenji wà ndekeelu kùdi beena Yudà nè bakwàbò abu, mwàkacyènzaYe anyi? Mpindyewu eci ke cyà... .

¹⁶³ Bu Yèyè mwà kuDimwènesha mùshindù mukwàbò kanà wònsò, kupicila ku dngumba, Yèyè's mmufwànyine kwikala kàyi mujaalàme to. Yèyè kacya kàtukù muDimwèneshile mu dngumba to, bwalu kakùvwa dngumba mu matùkù Èndè to. Yèyè wàkaDimwèneshila ku citàmbe-mfùkilu, bu mutwàfumu ku dyàmba mu dindà emu, bu mufundu ku cimanu, dyandamuna. Yèyè ùdi umweumwe awu makèlèlèlè, leelù, too nè kashidi. Nzambi ìkalè neenù mpindyewu.

¹⁶⁴ Yèyè nè: “Ùmwè too nè ku makùmi àtaanu.” Èyo. Nganyi udi nè kartà kàà disambila kàà nombà umwe, udikù mwà kwela ànu cianza cyèbè muulu cyanààna anyi. Tàngilàayi twartà twènù. Muntu kampàndà udi mu tulaalu, anyi ní mpenyi pònsò, kàdi kàyiku mwà kujuuka to, muntu nè muntu àtàngilè kartà kàà bantu bakwàbò. Kàdi ànu kartà kakesè cyanààna. Ndi ngèèla meeji nè etu katwèna nè fòtò wanyi pampàlà apu to, nànsha nàнку. Kàdi ànu kartà kakesè kèètù kàà pàtupù aka. Nombà umwe, mwaba wònsò wùdi awu. [Mwanèètù wa balùme kampàndà ùdi wàmba nè: “Ànu apa mene.”—Muf.] Èyo. Udikù mwà kujuukila ànu kuulu mwaba wùdi awu anyi, mukalenge. Nombà ibidì, udikù mwà kwela cianza cyèbè muulu anyi. Inàbànzà udi *apa* ewu. Nombà isàtù, udikù mwà kwela cianza cyèbè muulu. [Katùpà kàà mukàbà wà mèyi munda mutupù.]

165 Tudi beenyi. Ewu mmusangu wètù wà kumpàlà wà ditwilangana dībā adi, mu mwoyi emu, mündi ncinka. Dībā adi, Mukalenge Nzambi ngudi mutumanyè twètù bõnsò bābīdi. Yēyè ngudi mumanyè maalu èbè ònsò, nè Yēyè ngudi mumanyè byõnsò bīdi bīntāngilā mēmè. Kādi bu Yēyè, mu musāngeelu Wēndè, mufwānyine kukūmbana . . .

166 Bu mēmè mwà kukwambila nè: “Kaa, mukalenge, udi usaama. Nè ndi . . . Neūmvwè bīmpè.” Udi mufwānyine kwikala nè bukenji bwà kwela aci mpatà. Batèeleji abu mbafwānyine kwikala nè bukenji bwà kwela kabavu, bwalu abu’s. Cyà bushùwà. Udi wēwè ànu nè diyi dyānyī.

167 Kādi bu Nyumà Mwīmpè mwà kulwa kumwambila cintu kampāndā cidīye mwēnzè, cintu kampāndā cīndi mēmè nciyi mumanyè bwalu bwāci nānsha būmwè, cītù cyenzeka, yēyè neāmānyè nè aci ncilelèlā anyi to.

168 Dībā adi pīikalābi nè Yēyè mmumanyè cyākādiku, cyà bushùwà, pīikalābi nè ncyà bushùwà, Yēyè ùdi mwà kukwambila cīikalāku, nè necīikalè cilelèlā.

169 Bivwa bikēngela bwà wēwè kwitabuujā aci, Māndāmù Cox, kī mmwōmò anyi? Māndāmù Cox udi musōmbe pāāpa wāwa, ndi mfūma ku dimumōna, wa ku Kentucky, lwā apa nūnku. Awu’s m’Māndāmù Wood. . .mwaba kampāndā mu èkèleeziyā emu, mamwēndè. Kānsērè kamanè kumudyā mpāla yōnsò, munda *emu*.

170 Mvwa ngenda mpweka ngūūmukila ku meetu à ku nord. Mukājāānyī kumbīikilayè, wām̄ba nè: “Kacya nciitukū mwanjī kumōna muntu nānsha umwe mufwè naayī kacya bāndela to, bu—bu Māndāmù Wood.” Kādi’s Mukalenge nè Māndāmù Wood mbalundā bāānyī bāā katāpūlā-katēèkà. Kē mēmè kuya kùdi inābānzā awu, kwalukila nè EMU MMŪDĪ MUKALENGE WĀMBA. Kānsērè aku kākāfwā.

171 Mwaba awu, mukājī udi musōmbe mwaba awu awu, kādi mbikolè bwà kwamba cīdi. . . Udiku mwà kujuukila ànu kuulu cyanaānā anyi, Māndāmù Cox, bwà bantu kumōnabò. Luseke lwēndè lwōnsò lwā dyūlū alu, ludyā lwōnsò kùdi kānsērè, kabwelè too nè mu mēsū. Kūdimukā bwà batèeleji bākumōnè lwā paanyimā pāāpa. Kānsērè.

Ūtu misangu yōnsò ànu mubingè. Kacya kātukū mupīile to.

172 Mpindyewu, bu Mukalenge Nzambi wetù mwà kubuulwila mwanēētū wa balūme ewu, yēyè ikalè mulumbulwishi, bu Mukalenge Nzambi wetù mwà kumubuulwila cidīye mulwilè kaaba aka. Anyi, cintu kampāndā mwākenzelāYe mukājī awu ku. . .Anyi, bu mūvwāYe mufwānyine kwamba bu mwākambilāYe Filipò, pāākamusanganā Natānāèlā. . .anyi Natānā-. . . Filipò kusanganayè Natānāèlā. Nè neācibuulūlè, nenwītabuujè bōnsò bwēnū anyi, nwēnū bōnsò nenwītabuujè anyi? Muntu awu yēyè—yēyè mumanyè nè ncyēna mumanyè

kantu nànsa kàmwè pa bwalu bwèndè to; nè ndi nè byanza byànyì byela muulu, ncyèna mumanyè kantu nànsa kàmwè pa bidì bìmütàngila to. Mmwele byanza byèndè muulu nè, ncivwa mumumanyè to, anyì yèyè kî mmummanyè to. Nènku bu Mukalenge mwà kucibuulula, nwènu bônso nenüciitàbè, kî mmwômò anyì? Mbanganyì? Elàayi byanza byènu muulu, bwà ngàäfika ku dimòna. Mpindyewu, Mukalenge ànübènéshè.

¹⁷³ Mpindyewu, mukalenge, ndi mwimàne ànu kaaba aka, mwindile bwà kumòna ciikalàYe mwà kungambila, pa nàнку wèwè ke wakòsa bwalu abu. Nènku muntu yèyè mwà kutàngila, muntu mulùme ewu ùdi nè mèsù mabwita, pa nàнку nudi numòna nè kî ncifwànyine kwikala lubùku to. Shààla wèwè ànu nè mèsù èbè mabwita. Bu Mukalenge wetù Yesù. . . Bu Yèyè mwà kucibuulula, netwikalè nè kusàkidila kùdiYe.

¹⁷⁴ Kàdi muntu udi mwimàne kumpàlà kwànyì ewu, cidiye mulwilè kaaba aka aci, mbwalu bwà nyumà bùdiye ùjinga bwà bàmusambidilè. Aci's ncilelèlà. Ní ncyà bushùwà, elà cyanza cyèbè muulu bwà bantu kumònabò. Mpindyewu nudi nwiatabuuja anyì? Kacya ncitu mwànji kumumònakù to kacya bändela, kàdi's ke cyòci eci. Cintu kampàndà cidi cimutàcisha mu meeki. Mpindyewu, pàndi ntàmba kwakula nendè, byàbüngi bìvwa mwà kwambiibwa. Mpindyewu ikàlaayi nè kaneemu.

¹⁷⁵ Cyàkenzà Mwanjèlò awu ncinyì? Ùvwa mukomè nyimà Wendè, nè kwambaYè nè: "Sarah wàsekì bwà cinyì?"

Yèyè nè: "Ncyèna musekèku to."

Yèyè nè: "Kaa, èyowà's, udi musekè." Bwalu, ùvwa nè bwòwà.

¹⁷⁶ Mpindyewu bu batèeleji mwà kutùngunuka nè kutèeleja diyì dyànyì, ku bipwidi. Muntu ewu nyèwù umwèka bu udi wenda ùùmuka kùndi. Ndi mmòna muntu mukàji mwimàne kuulu. Ke cintu cyà musinga cidi muntu mulùme ewu mulwilè kaaba aka. Mbwa mukàjèndè, nè yèyè kèna nendè kaaba aka to. Nè ùdi nè disaamà dyà bànà bakàji, disaamà dyà bainàbànza, nè ùdi nè lutàtù lwà nyimà wendè awu. Aci mbulelèlà.

¹⁷⁷ Kwèna wa mu cimenga eci to. Udi wa mu cimenga cikwàbò, cidi cibiikidiibwà nè Marysville. Aci's ncilelèlà. Mpindyewu alùkilaaku kwèbè kumbèlu ùkacisangànè mùshindù wùdi mucitàbùuje awu. Nebiikalè mùshindù awu, mu Dìna dyà Mukalenge. Nzambi àkubènéshè. Mùshwàlà awu, kwàkukèngela bwà kumutentekelawù to, uvwa naawù mu cibòmò mwèbè amu bwèndè yèyè, kàdi kwàkwikala naawù dijinga to.

¹⁷⁸ Ndi mukumanyè cyà bushùwà. Ncyèna mumanyè dìnà dyèbè to. Kàdi wèwè udi muntu mukàji uvwa mwimàne lwà ku ciibi cyà paanyimà pààpa, dīngà ditùkù, divwà Mwanjèlò wa Mukalenge mulwè kùndi, dībà dyùvwa mulwe musangu wèbè wàkumpàlà mu tabernacle emu, nè kusokolola cintu kampàndà cívwa mùnsokòntù wà menemene ewu. Nè wèwè kwondopiibwa, ku kànsère. Ncyà bushùwà. Kàdi ncyèna nè cingènyingenyi nànsa

cikesè cyà cidi cikutàcisha mpindyewu to. Ncyèna mumanyè to. Aci's udi mumanyè. Ncyènakù nè cingènyingenyi nànsha cikesè cyà cidi cikutàcisha to. Kàdi, bu Mukalenge mwà kucibuulula, neucitabè anyi? [Mwanèètù wa bakàji awu ùdi wàmba nè: "Eyowà."—Muf.] Ndi. . .

¹⁷⁹ Kwèna kaaba aka bwèbè wèwè mwinè to. Udi kaaba aka mbwà mwànà kampàndà. Nè yèyè mwànà awu ùdi mu lutàtu. Lutàtù lùdi lùsanganyiibwa mu mwongo. Byenze bu, kèna mwà kuuuka kuulu to, anyi cintu kampàndà cyà mùshindù awu. Nè ndi mmòna baledi bàà mwànà awu, nè lùnzaadi. Mbeena Kàtòlikè. Nènku babàka bàbidi bakùlumpè, mùdibi, baakakwàbò mbeena Kàtòlikè, bòbò pààbò. Nè wèwè udi mwimàne bwà mwànà awu. Angàtà mùshwàlà wèbè ùkawùtentèkè pambidi pèndè. Kwèdi mpatà to, udi mwà kupeta cyùdi ulòmba aci. Mpindyewu itàbùùjà nè mwoyi wèbè wònsò.

Udi witabuuja anyi?

¹⁸⁰ Ngèèla meeji nè inàbànzà ewu mmwenyi kùndi. Katwèna bamanyàngàne to, kàdi Mukalenge Yesù mmutùmanyè bònsò bùbidi bwètù. Mpindyewu cimfwànyì cipwàngàne ncyòci eci. Cimfwànyì cipwàngàne cyà Yone Munsantu 4 ncyòci eci. Mukàji wa bafike, mulùme wa batòoke; mu ditùkù adi, ùvwa mwena Sàmaalèyà, nè mwena Yudà, bisà bibidi byà bantu. Yesù wàkamumanyisha, lùkàsàlùkàsà nè, kakùvwa dishiilangana to. Tudi bònsò bifùkùibwà byà Nzambi. Ditunga ditùdi basòmbèlemù edi, ndidi dishintulula diikala dyètù, kadyènamù nè bwalu nànsha bùmwè to. Nzambi ùvwa muswè bwà cisàmbà Cyèndè ciikale mùshindù awu. Wàkenza muntu mutòoke, mufike, mufikùlùke, wa kàlaabi, mukùnze. Wàkabènza mùshindù awu. Aci ndyenza Dyèndè. Nè Yèyè mmutùnangè bònsò. Kàdi cimfwànyì cipwàngàne ncyòci eci, bantu bàbidi bàtu kacya kabàyiku bânji kutwilanganakù kwònsò eku, nè wetù musangu wà kumpàlà, bisà bibidi bishiilàngàne.

¹⁸¹ Mpindyewu, ndi njingulula nè wèwè udi mwena kwitabuuja. Udi mwena Kilistò, bwalu nyumà webè mmwitàbìibwe bimpè. Nènku Mwanjèlò munène wa Nzambi awu kàvwakù mufwànyine kwakidila cintu nànsha cimwè cìvwà cìbì to. Nànsha kakesè. Nudi bamòne fòtò udi kuulu wàwa, Mwanjèlò udi pa fòtò awu, Bukènkè bùdi kumutù kwànyì mwaba wùndi mwimàne ewu anyi? Ke cidi cyèenza nè ùdyumvwè mùdi udyùmvwà mpindyewu amu. Bùdi ànu munkaci mwà kukupwekela pambidi.

Anji indilà kakesè, Mwanèètù wa bakàji Gertie.

¹⁸² Cidi cimwèka bu cintu kampàndà, ncyèna mwà kubàkula inàbànzà awu bimpè menemene to. Eyowà. Mukàji ewu ùdi ùsaama dinyùnguluka dyà mutù. Ùdi ùsaama dinyùnguluka dyà mutù. Ùdi ùmacisha bintu. Ncyà bushùwà. Nè pashiishe udi nè lutàtù lwà nyumà lùdi uteeta bwà kujikija, bwalu uvwa munkaci mwà kulùsambidila kùkaadi cikondo kampàndà. Aci's ncilelèlà.

Kàbìdì udi nè binyòka. Ndi nkumòna utàta bwà kujuuka mu bulààlu bwèbè, nè lujòòkò, nangànangà mu dindà. Udi nè cintu kampàndà cipampàlàmuke mu mwongo wèbè, kàbìdì, disaamà dyà mwongo. Aci cìdì EMU MMÛDÌ MUKALENGE WÀMBA.

¹⁸³ Udi witabuuja nè mèmè ndi mupròfetà wa Nzambì anyi? Udi witabuuja nè Nzambì umweumwe uvwa mumanyè Simonà awu mmufwànyine kukumanya anyi? Bu Nzambì mwà kubuulula aci, necikuvwije mwena kwitabuuja wa dikàndà, bwà wàpeta cyùdì upeta aci anyi? Bàtu bàkubiikila nè: “Nanny.” Nè dìnà dyèbè dyà munda n’Johnson. Nènku udi musòmbèle mu New Albany. Alùkilaaku kwèbè kumbèlu ùsàngalè, mu Dìnà dyà Mukalenge Yesù. Amen.

Itàbùùjà ànu cyanaàna.

¹⁸⁴ Katwèna bamanyàngàne muntu nè mukwèndè anyi, inàbànzà? Tudi beenyi. Ànu bwà—ànu bwà bantu bààmònakù, uidikù mwà kwela ànu cyanza muulu cyanaàna, bwà kwamba nè: “Katwèna bamanyàngàne to. Ànu . . .” Mpindyewu Mukalenge Nzambì mmutùmanyè twètù bònsò bàbìdì. Nènku bu Yéyè mwà kufila dilòmbà edi, newikalè nè disànkà bwà bwalu abu anyi?

Mpindyewu bàmwè bàà kunùdì mbabangè kwitabuuja.

¹⁸⁵ Mpindyewu, kùdì ànu kutùngunuka nè kumweka muntu mulùme mutòòke kumpàlà kwà mukàjì ewu.

¹⁸⁶ Mmuntu mulùme udi musòmbè ànu mwaba awu mene. Udi nè . . . Bìdì ànu bìmpè, shààla wèwè ànu mwaba wùdì awu. Udi nè disaamà dyà twonyi. Udi nè disaamà dyà nyimà. Nè udi nè disaamà dyà cifù. Ncyà bushùwà. Mpindyewu ndàaku, mwikale witabuuja, nè kabyàkukutàcisha kàbìdì to.

¹⁸⁷ Itàbùùjaayi ànu cyanaàna. Ndi ngèèla diitabuuja dyènù kadyòmbò bwà kuciitabuuja. Mbanganyi bàdì bàciitabuuja nè mwoyi wènù wònsò? Èyo, dìbà adi tàngilàayi nè nwikalè nè mwoyi.

¹⁸⁸ Bu Mukalenge Nzambì wetù mwà kubuulwila mukàjì ewu udi mwenyi ànu wetù wa menemene ewu kùndì, nè tudì nè byanza byètù byela muulu bìleeja nè kacya katùtu batwilàngàneku kumpàla, ku dyètù dimanya to, nènku bu Mukalenge Nzambì wetù mwà kubuulwila mukàjì ewu nè kwenza cintu cimwècimwè cyàkenzàYe aci, bu mukàjì wa ku . . . mukàjì wa beena Sàmaalèyà awu, nudi bònsò mwà kwitabuujakù nè mwoyi wènù ònsò dìbà adi, aci necikosè bwalu abu kashidi, kunùdì anyi?

¹⁸⁹ Nwamònu’s, ndi nè disangisha dilwalwà. Bìkèngela ngùùmukè mààlabà. Nènku bìkèngela nye ku Virginie, nè ku disangisha dinène dilwalwà. Ncyèna muswè kutàmba kuzengela bikolè to, pàndì mwimàne mwaba ewu. Èyo, nèngàngate dìbà, ànu bwà katanci kakesè cyanaàna, nè mukàjì ewu. Nè nudi nwitabuuja.

190 Mukàjì ewu nànsa yèyè mwikàle nganyì, ùdi nè mîdimà yà mmwènekèlu mubì be yimulonda. Kaa, cintu's—cintu's ndibungama. Udi mufùme ku dipeta lutàtu kampàndà. Udi mujimije mwànà, mwànà wa mu dibòkò. Ncyà bushùwà. Nè cikwàbò cintu, udi mutàcìshìlwe nè disaamà dyà bânà bakàjì, disaamà dyà bainábànzà, nè disaamà dyà nyimà. Nè wèwè kàbìdì udi nè cintu kampàndà cyà mùshindù kampàndà cìdì cikwenzekela, byenzè bu udi uminyina. Kaa, ciseki. Ncyà bushùwà. Kwèna wa mu cimenga eci to, nànsa mene. Udi musabùke musùlù, bwà kulwa mwab'ewu. Udi mufùmìne ku Louisville. Utu musòmbèle ku nombà kampàndà, ùbùkidiibwa nè: 1754 Mùsèèsù wà West Oak. Dìna dyèbè m'Margaret Quinn. Eyo.

191 Mukalenge Nzambì, Mufùki wa mauulu nè buloba, pèeshakù mukàjì ewu cidiye ùjinga, bwalu ndi ndòmba bwà mwena lukunà ewu àmuumùkè, mu Dìna dyà Yesù. Amen.

192 Nzambì àkubènèshè, inábànzà. Kwèdikù kàbìdì mpatà to. Ndàaku ùpetè mpindyewu cyùdì mulòmbè aci.

193 Udi witabuuja nè mwoyi wèbè wònsò anyì?

194 Wetwàwu, mukalenge? Ewu's mmusangu wètù wà kumpàlà wà ditwilangana, ngèèla meeji. Udi witabuuja nè Mukalenge Nzambì wètù ùdi kaaba aka bwà kukumbaja nè kukupèesha bintu byùdì ùjinga anyì? [Mwanèètù wa balùme awu ùdi wàmba nè: “Èyowà, ndi ngùtabuuja. Ndi mumanyè nè Yèyè ùdi kaaba aka. Ndi mwà kuMumòna.”—Muf.] Ndi ngàanyisha dikima dyèbè. Nènkù udi kaaba aka bwà cintu cyà mushinga. Udi muswè kulekela dinwà dyà maalà nè dinwà dyà mfwankà. Èè, mbimanè kukushìila kaaba mpindyewu. Ndàaku, nè ditalala dyà Nzambì diikalè neebè nè dikwitàbùùjìjè. Nzambì ikalè neebè.

“Bu wèwè mwà kwitabuuja, bintu byònsò bìdi mwà kwenzeka.”

195 Udi muswè kutàpuluka nè disaamà dyà nyimà adi anyì? Pwekà kuntu kwàka, wenda uMutùmbisha, nènku neùtapulukè naadi. Ndàaku ànu cyanàànà, mwikàle uciitabuuja, nè mwoyi wèbè wònsò.

196 “Bu wèwè mwà kwitabuuja,” mùdi Bible mwambè. Ikàlaayi nè kaneemu kààbùngì. Itàbùujaayi nè cìdì Nzambì wènza aci m'Bulelèlà.

197 Ndi mukumanyè. Nèngiikalè ànu mwà kukusambidila. Ndi mumanyè lutàtù lwèbè.

198 Mukalenge Nzambì, ikàlàku nè luse kùdì mukàjì ewu nè filakù dilòmbà edi, bwalu ndi ndòmba nùnkù mu Dìna dyà Yesù. Amen. Ncyèna mvùluka...Dìna dyèbè m'Baker anyì? [Mwanèètù wa bakàjì awu ùdi wàmba nè: “Èyowà's, mukalenge.”—Muf.] Ncyà bushùwà. Ndi—ndi mvùluka mpindyewu. Nzambì àkubènèshè. Tùngunuka wèwè ànu nè

kuya kumpalà mpindyewu nè ùMwitàbùùjè nè mwoyi wèbè wònsò. Èyo.

¹⁹⁹ Ncyèna mukumanyè to, inàbànzà. Tudi beenyi. Ncyà bushùwà. Udi muswè kudyà cyakudyà cyèbè cyà dilòlò aci, kutàpulukà nè disaamà dyà cifù adi, cyùjà cyùvwà naaci díbà dyònsò aci anyi? Ndàaku, ùkadyè, díbà adi, nè Yesù Kilistò ùdi ùkusàngaja.

²⁰⁰ Ndi mukumanyè bulelèlè. Nè ndi mumanyè cidì lutàtù lwèbè. Kwèna mumanyè—kwèna mumanyè nè ndi mucimanyè to, kàdi, ndi—ndi mucimanyè bulelèlè. Pa nànkù bu mùdibi nè utu ulwa ku tabernacle eku, ncyàkucyàmba to. Kàdi binyòka nebikuumùkè bu wèwè ànu mwà kuciitabuuja. Nda mutàngile kumpalà. Nzambi àkubènèshè.

²⁰¹ Twàmbàayi nè: “Twasàkidila Nzambi.” [Disangisha didi dyàmba nè: “Twasàkidila Nzambi.”—Muf.]

²⁰² Udi mubindùlùke, wèwè pèèbè. Udi nè disaamà dyà cifù dikutàcisha. Udi witabuuja nè Mukalenge Yesù neàkusàngàjè anyi? [Mwanèètù wa bakàji awu ùdi wàmba nè: “Ndi ngùtabuuja.”—Muf.] Nànkù ndàaku, nè ditalala dyà Nzambi diikalè pambidi pèèbè. Ndi muswè ànu kukutentekela byanza cyanààna, nè kwitabuuja nè mwoyi wètù wònsò nè, Nzambi nèàcyènzè.

²⁰³ Ndi mwenyi kùdi, ngèèla meeji, inàbànzà. Udi mummanyè anyi? Utu ulwa mwab'ewu mu èkèleeziyà emu anyi? Utu ulwamù. Kacya ncitukù mwànji kukumòna to. Mu bushùwà bwà bwalu, bantu bàabùngi menemene bàtu bàlwa. Èyo. Ndàaku, mwikàle witabuuja, nè disaamà dyà bânà bakàji adi nedikushiile kaaba, disaamà dyà bânà bakàji dyùvwà naadi adi. Udi witabuuja anyi? [Mwanèètù wa bakàji awu ùdi wàmba nè: “Èyowà.”—Muf.] Èyo, nànkù ndàaku, nè Nzambi neikalè neebè nè neàkukwàcishè, ndi mutwishìbwe.

²⁰⁴ Udi witabuuja anyi, mukalenge? Udi witabuuja nè Mukalenge neùmushè dipapakana adi kùdi, nè kukusàngeeja, binyoka abi anyi? Ndàaku wàlukile kuntwaku, wenda uMusàkidila nè uMutùmbisha bwà cyòci aci, pashìshe neùsangalè.

²⁰⁵ Udi mutàcishìbwe nè disaamà dyà dibinduluka, kí mmwòmò anyi, inàbànzà? Aci ndibinduluka dyà mu mutù. Udi wenda ucyòka be, udi ùsàama disalala dyà mubidi nangàngà mu mapingaja. Nànsha Sàtaanà mwinè mmukwambile nè neùjimijè lungènyi. Ncyà bushùwà. Kàdi mmashimi. Neùmvwè bimpè. Kí ncìngà cintu to ànu cikondo cyà mwoyi cyùdi ubwelamù. Cikaadi ndiimana dyà dimònà dyà cijila. Mukàji yònsò ùdi nè cyà kufika ku cyòci aci. Kàdi neùsangalè mpindyewu. Udi witabuuja díyi dyànyi anyi? Nànkù ndàaku, ùsàkidile Nzambi, nè wimbà misambu nè ucyònkomoka, nè ùsangalè.

awu apu, ku ndekeelu kwà mulongo, wêwè! Udi nè kartà kàà disambila anyi? Kwèna nè kartà kàà disambila to. Udi witabuuja nè mèmè ndi mupròfetà wa Nzambi anyi? Bu Nzambi mwà kunsokolwela cidì lutàtù lwèbè, nèucitàbè dibà adi anyi? Udi nè disaamà dyà mwoyi. Udi musòmbe ku luseke lwèbè awu's mbàyeebè, nè ùdi nè disaamà dyà mijilu. Mpindyewu ndààku wìtabuuje.

Nganyi udi uMwitabuuja?

216 Kàdi bìshi bwà muntu mufiike udi musòmbe apa ewu? Udi witabuuja anyi, mukalenge? [Mwanèètù wa balùme awu ùdi wàmba nè: “Èyowà's, mukalenge.”—Muf.] Udi witabuuja nè mèmè ndi musadidi Wendè anyi? [“Èyowà.”] Udi ujinga disambila, kì mmwòmò anyi? [“Èyowà.”] Bu Nzambi mwà kumbuulwila, kuumukila kùndì mèmè kulwa kunùdì, nudi nwitabuuja nè Yèyè...bwà nè nudi mwà kuciitaba anyi? [“Èyowà.”] Udi nè disaamà dyà mutù wà kapàla. Nè udi nè mpùtá. Ncyà bushùwà.

217 Bishi bwà yònsò wa kunùdì aku, nudi nwitabuuja anyi?

218 Kùdì mukàjì mukwàbò wa bafiike ànu lwà paanyimà pàà inàbànzà udi paanyimà apa ewu. Udi nè cyanza cyela muulu, mwanèètù wa bakàjì. Udi muswè cintu kampàndà cyà kùdì Mukalenge anyi? Udi witabuuja nè mèmè ndi musadidi Wendè anyi? Ndutàtù lwà díyì dyà mukana, ke cyùdì usaama. Ncyà bushùwà. Udi witabuuja nè Yèyè wàkwondòpi anyi?

219 Ànu kuumukila ku wêwè aku, mmutàngile ku luseke, ànu kuumukila kùdì aku lwà ku ndekeelu kwà mulongo aku; lwà ku bantu batwè ku ùmwè, bàbìdì, bàsàtù, bànaayi, bàtaanu, paanyimà pààpa. Udi nè lutàtù lwà kamina-bidyà. Udi witabuuja nè Nzambi neàkusàngàje anyi?

220 Kàdi bìshi bwà lwà paanyimà apa? Muntu udi ku ndekeelu kwà nkwasá awu, ànu lwà paanyimà apa mu mulongo emu. Udi nè cyùjà cyà mu dila. Ncyà bushùwà, mukalenge. Udi witabuuja nè Nzambi ùdi ùkwondopa anyi? Nàнку juukila kuulu ùcitàbè, mu Dìná dyà Mukalenge Yesù.

221 Nzambi àkubènèshè. Kacya ncitukù mwânji kukumòna to. Wêwè udi mwenyi kùndì. Kàdi Nzambi mmukumanyè.

222 Nudi nuciitabuuja anyi, muntu nè muntu wa kunùdì? Nudi nwitabuuja nè Mwanjèlò umwèumwè wa Nzambi wàkalwa kùdì Abraham awu, mu luse, Wàkamanya minsokòntù yà meeji à Sarah awu, yèyè umweumwe wàkiimana pa buloba nè kumanya maalu masokome à mu meeji awu, kanwènaayikù nwitabuuja nè Yèyè ùdi kaaba aka mpindyewu anyi? Nzambi umweumwe awu, kumpàlà menemene kwà buloba kwoshikabù cyàkàbìdì mu dibùtuka, kanwènakù nwitabuuja nè Yèyè ùdi kaaba aka anyi? Dibà adi tùMwitàbè. TùMwitàbùjjaayi. TuMwangàtaayi bu mwondopi wetù, mpindyewu mene. Mbanganyi bàà kunùdì bìikalà mwà kwitabuuja aci?

223 Mbanganyi bàà kunùdì aku bàdì biitabuuja cyà bushùwà? Elàayi byanza muulu. Mpindyewu, tentèkaayi, pwekèshaayi byanza byènù.

224 Bible mmwambè nùnkù: “Bimanyinu ebi nebililè aba bàdì biitabuuja.”

225 Tentèkèlàngànaayi byanza muntu nè mukwèndè, dibà adi, panwikalà beena kwitabuuja. Udi usambidila muntu udi ku luseke lwèbè awu. Nè udi ku luseke lwèbè awu, àkusambidilè yèyè udibò bàsambidila awu. Muntu nè muntu wa kunùdì, sambidilàngànaayi muntu nè mukwèndè mpindyewu, mwaba kanà wònsò mu nzùbu emu. Ndi ngèèla diitabuuja edi kadyòmbò.

Inàbànà wàwa udi nè disaamà dyà cyàdì, pwaku mwoyi bwalu abu. Udi mwondòpiibwe.

226 Wèwè udi nè disaamà dyà mpàcì wa menyì, musòmbè mwaba awu, mukalenge, ujuuka munda mwà bufùkù. Pwaku aci mwoyi. Kabyàkukengela bwà wèwè kucyènza kàbidì to. Nzambi àkubènèshè.

227 Ndi nnwèla kadyòmbò bwà kwenza cyenzi cyà kwitabuuja. Nudi nucyènza anyi? Nànkù sambilaayi, muntu nè muntu wa kunùdì, mu wènù mùshindù sungasunga. Tentèkèlà muntu kampàndà byanza nè ùsambidilè muntu kampàndà udi ku luseke lwèbè awu, pàndì nnusambidila nwènù bònsò apa.

228 Mukalenge Nzambi, Mufùki wa maulu nè buloba, mfùkyamukele wa Mwoyi wà kashidi, mufidi wa dipà dímpè dyònsò, tumaakù Nyumà Webè mpindyewu mene pa cisàmbà eci.

229 Ndi mpiisha byenzi byà dyabùlù, bwalu dyabùlù mmwediibwe patòoke. Sàtaanà, kwèna mwà kushàala mubàlamè kàbidì ntàntà mule to. Diitabuuja dyàbò didi dibànda, nè bàdì nè byanza byàbò bitentekelangana muntu nè mukwèndè. Kàdi ndi nkwela kadyòmbò, bwà nè udi mujimje mvità, nè cilumbulwidi cikaadi pabwìpì. Pàtukà munda mwàbò, mu Dìnà dyà Yesù Kilistò. Pàtukà munda mwàbò, mu Dìnà dyà Yesù.

230 Nudi baMwitàbùje anyi? Elàayi byanza byènù muulu nùMupè butumbi bwà dyondopiibwa dyènù. Pawikalà mucibùkile panshì, juukilà kuulu; Kilistò udi ùkusàngaja. Pawikalà mulèma, mwikalè nè byanza byèbè nè bulèma, byele muulu; kwàjiki.

Mukàjì mucibùkile panshì nyèyè ewu, mwimàne kuulu.

231 Mukalenge atumbè's we! Twàmbàayi nè: “Mukalenge àtumbè,” bantu bònsò. [Disangisha didi dyàmba nè: “Mukalenge àtumbè!”—Muf.] Amen.

Mwanèètù Neville. 

58-0309E Èkèleeziyà Neàye
Kumpàlà Kwà Dikènga Dinène Anyi?
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org